

摘藻堂四庫全書薈要

史部

欽定四庫全書薈要

史部
明史卷三百十五

詳校官中書臣劉源溥



欽定四庫全書薈要卷六千九百八 史部

明史卷三百十五

大學士張廷玉等奉 敕修

列傳第二百三

雲南土司三

緬甸 二宣慰司

干崖 宣撫

潞江

南甸 二宣撫司

芒市

者樂甸

茶山

孟璉
即猛臉

里麻

鈕兀

東倘

瓦甸

促瓦

散金

木邦

孟密宣撫司附

孟養

車里

老撾

八百
二宣慰司

緬甸古朱波地宋寧宗時緬甸波斯等國進白象緬甸

通中國自此始地在雲南西南最窮遠有城郭廬舍多樓居元至元中屢討之乃入貢明太祖即位遣使齎詔諭之至安南留二年以道阻不能達而返使者多道卒洪武二十六年八百國使人入貢言緬近其地以遠不能自達帝乃令西平侯沐春遣使至八百土官所諭意於是緬始遣其臣板南速刺至進方物勞賜之二十七年置緬中宣慰使司以土酋卜刺浪為使二十八年卜刺浪遣使貢方物訴百夷思倫發侵奪境土二十九年

復來訴帝遣行人李思聰錢古訓諭緬及百夷各罷兵
守土倫發聽命會有百夷部長刀幹孟之亂遂倫發以
故事得已永樂元年緬酋那羅塏遣使入貢因言緬雖
遐裔願臣屬中國而道經木邦孟養多阻遏乞命以職
賜冠服印章庶免欺凌詔設緬甸宣慰使司以那羅塏
為宣慰使遣內臣張勤往賜冠帶印章於是緬有二宣
慰使皆入貢不絕五年那羅塏遣使貢方物謝罪先是
孟養宣慰使刀木旦與戛里相攻那羅塏乘釁襲之殺

刀木旦及其長子遂據其地事聞詔行人張洪等齎敕諭責那羅塿懼歸其境土而遣人詣闕謝罪帝諭禮部曰蠻既服辜其釋不問仍給以信符令三年一朝貢初卜刺浪分其地使長子那羅塿管大甸次子馬者速管小甸卜刺浪死那羅塿盡收其弟土地人民已而其弟復入小甸遣人來朝且訴其情敕諭那羅塿兄弟和好如初毋干天討六年那羅塿復遣人入貢謝罪并謝賜金牌信符勞賜遣之七年復遣中官雲仙等齎敕賜緬

酋金織文綺十二年緬人來言為木邦侵掠帝以那羅
塢素強橫遣人諭之使修好鄰封各守疆界洪熙元年
遣內官段忠徐亮以即位詔諭緬甸宣德元年遣使往
諭雲南土官賜緬甸錦綺二年以莽得刺為宣慰使初
緬甸宣慰使新加斯與木邦仇殺而死子弟潰散緬共
推莽得刺權襲許之自是來貢者只署緬甸而甸中之
稱不復見八年莽得刺遣人來貢復遣雲仙齎敕賜之
并諭其勿侵木邦地正統六年給緬甸信符金牌時麓

川思任發叛將討之命緬甸調兵待七年任發兵敗過
金沙江走孟廣緬人攻之帝諭能禽獻賊首者予以麓
川地八年總督尚書王驥奏緬甸酋馬哈省以速刺等
已禽獲思任發不解至唯以麓川地為言朝命遂有并
征緬甸之命是時大師已集騰衝緬使致書期以令冬
送思任發至貢章交付驥與尅期遣指揮李儀等率精
騎通南牙山路抵貢章受獻而緬人送思任發者竟不
至九年驥駐師江上緬人亦嚴兵為備遣人往來江中

覘官軍虛實驢以麓川未平緬難不可復作乃令總兵
官蔣貴等潛焚其舟數百緬人潰驢亦班師於是總兵
官沐昂奏緬恃險黨賊應加兵但滇中方連年征討財
力困弊旱澇相仍糧餉不給未可輕舉臣已遣人諭緬
禍福俾獻賊首緬宜聽從十二年木邦宣慰罕蓋法緬
甸故宣慰子馬哈省以速刺遣使偕千戶王政等獻思
任發首及諸俘馘至京併貢方物帝命馬哈省以速刺
並為宣慰使賜敕獎勞給冠帶印信未幾以速刺奏求

孟養戛里地且請大軍亟滅思任發之子思機發兄弟

而已出兵為助帝諭以機發可不戰禽宜即滅賊以求

分地弗為他人得也景泰二年賜緬甸陰文金牌信符

時以速刺久獲思機發不獻又放思卜發歸孟養朝廷

知其要挾故緩之五年緬人來索地參將胡誌以銀戛

等地與之乃送機發及其妻孥帝以思卜發既遠遁不

必窮追仍加賞錦幣降敕褒獎成化七年鎮守太監錢

能言緬甸宣慰稱貢章孟養舊為所轄欲復得之帝命

往勘貢章係木邦隴川分治孟養係思洪發所掌非緬境乃令雲南守臣傳飭諸部而緬甸以所求地乃前朝所許貢章乃朝貢必由之途乞與之又乞以金齒軍餘李讓為冠帶把事以備任使兵部尚書余子俊等以思洪發不聞有過豈可奪其地李讓中國人而與為把事亦非體宜勿許帝命兵部諭其使孟養貢章是爾朝貢所由當飭邊臣往諭思洪發以通道往來不得阻遏餘勿多望弘治元年緬甸來貢且言安南侵其邊境二年

遣編修劉戡諭安南罷兵然緬地鄰孟養而孟養以緬

先執思任發故怨緬嘉靖初孟養酋思陸子思倫糾木

邦及孟密擊破緬殺宣慰莽紀歲并其妻子分據其地

緬訴於朝不報六年始命永昌知府嚴時泰衛指揮王

訓往勘思倫夜縱兵鼓譟焚驛舍殺齋金牌千戶曹義

時泰倉皇遁乃別立土舍莽卜信守之而去值安鳳之

亂不暇究其事莽紀歲有子瑞體少奔匿洞吾母家其

酋養為己子既長有其地洞吾之南有古喇濱海與佛

郎機鄰古喇酋兄弟爭立瑞體和解之因德瑞體爭割地為獻受其約束號瑞體為噠喇瑞體乃舉衆絕古喇糧道殺其兄弟盡奪其地諸蠻皆畏服之時滅緬者木邦孟養而與緬相抗者孟密也孟密土舍兄弟爭立訴於瑞體瑞體乃納其弟為壻改名思忠遣歸孟密奪其兄印因假道攻孟養及迤西諸蠻以復前仇又使其黨卓吉侵孟養境後卓吉為思真壻猛乃頭目別混所殺瑞體怒自將攻別混父子禽之遂招誘隴川干崖南甸

諸土官欲入寇既覘知有備又慮他蠻襲其後乃遁歸
於是鎮巡官沐朝弼等上其事兵部覆荒服之外治以
不治噍喇已畏威遠遁傳諭諸蠻不許交通結納報可
時嘉靖三十九年也木邦土舍罕拔求襲不得怒投于
緬潞江宣撫線貴聞之亦入緬瑞體自以起孤微有兵
衆威加諸部中國復禁絕之遂謀內侵乃命線貴趣召
隴川土官多士寧士寧言中國廣大誠勿妄動瑞體稍
稍寢未幾士寧為其下岳鳳所殺于崖宣撫刀怕舉亦

死罕拔乃請瑞體入干崖干崖舉則隴川可坐定也瑞體子應裏桀黠多智言于瑞體曰干崖隴川雖無主遠難猝取孟養思箇近在肘腋又吾世仇萬一乘虛順流下禍不測瑞體深然之因借木邦兵一萬取干崖而自率兵侵孟養既至屢為思箇所敗思箇亦退保孟倫相持久之而隴川書記岳鳳欺其主幼私齎重賂投緬結為父子蠻莫土目思哲亦迎附瑞體調緬兵萬餘出入於迤西界上以牽制思箇復徵木邦罕拔兵會岳鳳於

隴川襲孟密萬厯元年緬兵至隴川入之岳鳳遂盡殺
士寧妻子族屬受緬偽命據隴川為宣撫乃與罕拔思
哲盟必下孟密奉瑞體以拒中國偽為錦囊象函貝葉
緬文稱西南金樓白象主莽噠喇弄王書報天皇帝書
中嫚辭無狀罕拔又為緬招干崖土舍刀怕文許代其
兄職怕文拒之與戰適應裏率兵二十萬分戍隴干間
以其兵驟臨之怕文潰奔永昌遂取干崖印付罕拔妹
以女官攝宣撫召蓋達副使刀思管雷弄經歷廖元相

佐之同守干崖以抗中國於是木邦蠻莫隴川干崖諸蠻悉附緬獨孟養未下金騰副使許天琦遣指揮侯度持檄撫諭孟養思箇受檄益拒緬緬大發兵攻之思箇告急會天琦卒署事羅汝芳犒思箇使令先歸待援遂調兵至騰越箇聞援兵至喜令土目烏祿喇送等領兵萬餘絕緬糧道且導大兵伏戛撒誘緬兵先入箇率蠻卒衝其前而約援兵自隴川尾擊之緬兵既敗糧又絕屠象馬以食瑞體窘甚會有陳於巡撫王凝言生事不

便者凝馳使止援兵汝芳聞檄退思箇待援不至岳鳳

偵知之集隴川兵二千兼程進導瑞體由間道遁去思

箇追擊之緬兵大敗當是時幾獲瑞體六年廷議遣使

至孟養俾思箇還所俘緬兵象并賚以金帛好言慰諭

之瑞體不謝七年永昌千戶辛鳳奉使買象於孟密思

忠執鳳送緬緬遣回是年緬復攻孟養報戛撒之怨思

箇以無援敗將走騰越中途為其下所執送瑞體殺之

盡并孟養地八年巡撫饒仁侃遣人招緬緬不應十年

岳鳳導緬兵襲破干崖奪罕氏印俘之俄瑞體死子應裏嗣岳鳳嗾應裏殺罕拔盡俘其衆又說應裏起兵象數十萬分道內侵十一年焚掠施甸寇順寧鳳子曩烏領衆六萬突至孟淋寨指揮吳繼勲千戶祁維垣戰死又破盞達副使刀思定求救不得城破妻子族屬皆盡且窺騰衝永昌大理蒙化景東鎮沅諸郡巡撫劉世曾請以南京坐營中軍劉綎為騰越遊擊移武靖參將鄧子龍為永昌參將各提兵五千赴勦并調諸土軍應援

緬亦合兵犯姚關綏與子龍太破之於攀枝花地乘勝
追擊自十年十月至十一年四月斬首萬餘復率兵出
隴川孟密直抵阿瓦緬將莽勾詣綏降勾瑞體弟也緬
將之守隴川孟養蠻莫者皆遁去岳鳳及其子皆伏誅
官軍定隴川遂歸應裏乃以勾子思斗守阿瓦復攻孟
養蠻莫聲言復仇副使李材備兵騰衝遣兵援之戰於
遮浪大破其象陣生禽五千餘人先是蠻莫酋思化投
緬材遣人招之思化降十九年應裏復率緬兵圍蠻莫

思化告急會天暑軍行不前裨將萬國春夜馳至多設
火炬為疑兵緬人懼而退追敗其衆二十二年巡撫陳
用賓設八關於騰衝留兵戍守募人至暹羅約夾攻緬
緬初以猛卯酋多俺為嚮導寇東路至是遣木邦罕欽
禽多俺殺之遂築堡於猛卯大興屯田是年緬帥思仁
寇蠻莫敗之斬其渠丙測二十三年應裏屬孟璉孟艮
二土司求朝貢鎮巡以聞朝議令原差官黎景桂齎銀
幣賜之至境不受詔以景桂首事貪功納侮下於理三

十一年阿瓦雍罕木邦罕拔子罕禧俱入貢緬勢頓衰
暹羅得楞復連歲攻緬殺緬長子莽機搗古喇殘破自
此不敢內犯然近緬諸部附之如初崇禎末蠻莫思繇
為緬守囊木河及黔國公沐天波等隨永明王走蠻莫
思繇使告緬緬遣人迎之傳語述萬厯時事并出神宗
璽書索今篆合之以為偽天波出已印與先所頒文檄
相比無差始信蓋自天啟後緬絕貢職無可考驗云

千崖舊名千賴賤白蠻居之東北接南甸西接隴川有

平川衆岡境內甚熱四時皆蠶以其絲織五色土錦充

貢元中統初內附至元中置鎮西路軍民總管府領三

甸洪武十五年改鎮西府後廢屬麓川平緬司永樂初

設干崖長官司二年給信符金牌并賜冠服三年長官

曩歡遣頭目貢馬及象犀金銀器謝恩賜鈔幣五年設

古刺驛隸干崖曩歡復遣子刀思曩朝貢賜賚如例自

是三年一朝貢不絕宣德五年改隸雲南都司時長官

刀弄孟奏其地近雲南都司而歲納差發銀於金齒衛

路遠乞改隸而輸銀於布政司從之正統三年命仍隸
金齒軍民指揮使司六年陞干崖副長官刀怕便為長
官司賜絲幣以歸附後屢立功從總兵官沐昂請也九
年陞干崖為宣撫司以刀怕便為宣撫副使劉英為同
知從總督王驥請也弘治三年干崖土舍刀怕愈欺其
姪刀怕落劾劫印奪職蠻衆不服遂起兵相攻四年按
察司副使林俊同參將沐詳移文往諭始釋兵歸印事
聞帝以鎮巡官不以時奏報責之嘉靖三十九年緬酋

莽瑞體叛招干崖諸土司入寇萬厯初宣撫刀怕舉死
妻罕氏木邦宣慰罕拔妹也拔既叛附緬召怕舉弟怕
文襲職以臣緬且許以妹怕文不受與戰緬兵十萬驟
臨怕文潰奔永昌罕拔遂以干崖印付罕氏十年隴川
岳鳳破干崖奪罕氏印十一年遊擊劉綏破隴川鳳降
追印竟不得而干崖部衆自相承代亦莫得而考云

潞江地在永昌騰越之間南負高崙山北臨潞江為官
道咽喉地多瘴癘蠻名怒江甸至元間立柔遠路洪武

十五年為府後廢永樂元年設潞江長官司其地舊屬
麓川平緬西平侯奏其地廣人稠故設司治之二年給
信符金牌九年長官司曩壁遣子惟羅法貢馬方物賜
鈔幣尋陞為安撫司曩壁來朝貢象馬金銀器謝恩宣
德元年曩壁遣人貢馬請改隸雲南布政司從之遣中
官雲仙齎敕及綺幣賜曩壁三年黔國公沐晟奏潞江
千夫長刀不浪班叛歸麓川劫潞江逐曩壁入金齒據
潞江驛逐驛丞周禮立寨固守斷絕道路請發兵討帝

敕晟與三司計議五年晟奏刀不浪班懼罪還所據地
歸舊部輸役如故乞宥之報可是年置雲南廣邑州時
雲仙還言金齒廣邑寨本永昌副千戶阿干所居干嘗
奉詔招生蒲五千戶向化今干孫阿都魯同蒲酋莽塞
等詣京貢方物乞於廣邑置州使阿都魯掌州事以熟
蒲并所招生蒲屬之帝從之遂以阿都魯為廣邑州知
州莽塞為同知鑄印給之八年改金齒永昌千戶所為
潞江州隸雲南布政司以千夫長刀珍罕為知州刀不

浪班為同知置吏目及清水關巡檢各一員正統三年
從黔國公沐晟奏改潞江安撫司仍隸金齒悉還舊制
五年安撫使線舊法以麓川思任發叛來告諭整兵以
俟未幾麓川賊遣部衆奪據潞江殺傷官軍潞江遂削
弱正德十六年安撫司土官安捧奪其從弟掩莊田三
十八所掩訟於官不報捧遂集蠻兵圍掩寨縱火屠掠
掩母子妻妾及蠻民男婦死者八十餘人據有其地官
軍誘執之捧死於獄帝命戮屍棄市其子詔及黨與皆

斬天啟間有線世祿者繼襲安撫

南甸宣撫司舊名南宋在騰越南半箇山下其山巔北
多霜雪南則炎瘴如蒸元置南甸路軍民總管府領三
甸洪武十五年改南甸府永樂十一年改為州隸布政
司宣德三年南甸為麓川侵奪有司請討不許降敕誠
諭麓川俾還侵地五年南甸州奏先被麓川宣慰司奪
其境土賴朝廷威力復之若不置官司以正疆界恐侵
奪未厭乞置四巡檢司鎮之帝命吏部除官八年又奏

與麓川接境舊二百夫長在騰衝千戶所時賴邦哈等處軍民兼守後麓川侵據不守者十餘年今蒙敕諭還竊恐再侵百姓逃移乞於賴邦哈九浪莽孟洞三處各置巡檢以土軍楊義等三人為之命下三司勘覆授之正統二年土知州刀貢罕奏麓川思任發奪其所轄羅卜思莊二百七十八村乞遣使齎金牌信符諭之退還帝敕沐晟處置奏聞麓川之役自是起九年陞州為宣撫司以知州刀落硬為宣撫使通判劉思勉為土同

知六年頒給金牌信符勘合加敕諭之十年免所欠差
發銀兩令安業後仍前科辦天順二年復置南甸驛丞
一人以土人為之時宣撫刀落蓋奏南寧伯毛勝遣騰
衝千戶蘭愈占其招八地逼民逃竄敕雲南三司官同
巡按御史詣其地體勘以所占田寨退還治勝愈罪南
甸所轄羅卜思莊與小隴川皆百夫長之分地知事謝
氏居囊宋悶氏居盞西屬部直抵金沙江地最廣司東
十五里曰蠻干宣撫世居之南百里有關立木為柵周

一里曰南牙甚高山勢延袤一百餘里官道經之上有
石梯蠻人據以為險

芒市舊名怒謀又曰大枯賧小枯賧在永昌西南四百
里即唐史所謂茫施蠻也元中統初內附至元十三年
立茫施路軍民總管府領二甸洪武十五年置茫施府
正統七年總兵官沐晟奏芒市陶孟刀放草遣人來訴
與叛寇思任發有讐今任發已遁去思機發兄弟三人
來居麓川者藍地方願禽以獻兵部言放草先與任發

同惡今勢窮乃言結鸞譎詐難信宜敕諭放草如能去
逆效順當密調土兵助勦機發從之八年機發令其黨
涓孟車等來攻芒市為官軍所敗放草來降靖遠伯王
驥請設芒市長官司以陶孟刀放草為長官隸金齒衛
成化八年木邦曩罕弄亂掠隴川敕芒市等長官司整
兵備調萬厯初長官放福與隴川岳鳳聯姻導緬寇松
坡營事覺伏誅立舍目放緯領司事轄於隴川芒市川
原廣邈田土富饒而人稍脆弱云

者樂甸本龍馬他郎甸猛摩地名者島洪武末內附隸
雲南布政司永樂元年設者樂甸長官司改隸雲南都
司以沐晟言其地廣人稠也十八年長官刀談來朝貢
馬自是皆以刀氏世領司事其地山險多瘴介於鎮沅
元江景東間日事攻戰鎧械犀利兵寡而勅諸部畏憚
之

茶山長官司永樂二年頒給信符金字紅牌八年長官
早張遣人貢馬宣德五年置滇澗巡檢司以長官司奏

滇灘當茶山瓦高之衝蠻寇出沒民不能安通事段勝頗曉道理能安人心乞置司以勝為巡檢從之

孟連長官司永樂四年四月設時孟璉頭目刀派送遣子壞罕來言孟璉舊屬麓川平緬宣慰司後隸孟定府而孟定知府刀名扛亦故平緬頭目素與等夷乞改隸遂設長官司隸雲南都司命刀派送為長官賜冠帶印章正統四年思任發反以兵破孟璉遂降於麓川為木邦宣慰罕蓋法擊敗七年總督王驥征麓川招降孟璉

亦保等寨敕賜孟璉故長官司刀派罕子派樂等綵幣以麓川平故也嘉靖中孟璉與孟養孟密諸部仇殺數十年司廢至萬歷十三年隴川平復設稱猛琿云

里麻長官司永樂六年設隸雲南都司以刀思放為長官時思放為里麻招剛招剛者故西南蠻官名思放籍其地來朝請授職事遂有是命仍賜印章冠帶八年遣頭目貢馬

鈕兀長官司宣德八年置鈕兀五隆諸寨在和泥之地

其酋任者陀比等朝貢至京奏地遠蠻多請授職以總其衆兵部請設長官司從之遂以任者為長官陀比為副

東倘長官司宣德八年置隸緬甸宣慰時緬甸宣慰昔得謀殺當蕩頭目新把的而奪其地新把的遣子莽只貢象馬方物乞置司庶免侵殺從之置東倘長官司命新把的為長官

瓦甸長官司初隸金齒永樂九年改隸雲南都司土官

刀怕賴言金齒遠都司近故改隸馬宣德八年置曲石
高松坡馬甸三巡檢司初長官司言其地山高林茂寇
盜出沒人民不安乞置巡檢司以授通事楊資楊中范
興三人從之命資於曲石中於高松坡興於馬緬正統
五年長官早貴為思任發所獲殺其守者十七人挈家
來歸帝嘉其忠順命所司褒賞以早貴為安撫賜綵幣
誥命

促瓦散金二長官司皆永樂六年設隸雲南都司其地

舊屬麓川平緬土蠻註甸八等來朝請別設長官司從之命註甸八等為長官各執印章

木邦一名孟邦元至元二十六年立木邦路軍民總管府領三甸洪武十五年平雲南改木邦府建文末土知府罕的法遣人貢馬及金銀器賜鈔幣永樂元年遣內官楊瑄齎敕諭木邦諸土官明年遣人來貢時麓川訴木邦侵地命西平侯諭之因改木邦為軍民宣慰使司以知府罕的法為使賜誥印時官軍征八百罕的法發

兵助戰攻江下等十餘寨斬首五百餘級詔遣鎮撫張伯恭經歷唐復往賜白金錦幣及其部領有差明年遣使貢象馬方物謝恩頒賜如例復加賜其母及妻錦綺罕的法卒其子罕賓發來朝請襲及賜冠服七年遣使謝恩又遣人奏緬甸宣慰使那羅壇數誘賓發叛賓發不敢從逆若天兵下臨誓當效命帝嘉其忠遣中官徐亮賚敕勞之賜白金三千兩錦綺三百表裏祖母母妻織金文綺紗羅各五十疋自是每三年遣使貢象馬十

一年賓發遣使獻緬甸俘時木邦攻破緬甸城寨二十餘多所殺獲獻於京師宣德三年遣中官徐亮齎敕及文綺賜襲職宣慰罕門法并及祖母母妻八年木邦與麓川緬甸各爭地訴於朝帝命沐晟并三司巡按公勘正統三年征麓川敕諭木邦以兵會勦五年總兵官沐昂遣人間道達木邦得報知宣慰祖母美罕板其孫宣慰罕蓋法與麓川戰於孟定孟璉地殺部長二十人斬首三萬餘級獲馬象器械甚衆帝嘉其功加授罕蓋法

懷遠將軍封美罕板太淑人賚以金帶綵幣七年總督
王驥奏罕蓋法遣兵攻拔麓川板罕貢章等寨追至孟
蒙獲其孥七人象十二麓川酋思任發父子遁孟廣帝
命指揮陳儀往勞之且曰木邦能自効生繫賊首獻其
酬以麓川土地人民八年免木邦歲辦金萬四千兩木
邦遣人謝恩并獻所獲思任發家屬復賜敕及綵幣獎
勞十一年緬甸獻任發首木邦亦遣使與同獻且修貢
職因求麓川地兵部以麓川已設隴川宣撫司請以孟

止地給之并遣官諭祭其母以表忠勤免木邦歲辦銀
八錠三年從之景泰元年罕蓋法奏乞隴川界者闌景
線地未報蓋法子罕落法輒發兵據之隴川宣撫刀歪
孟訴於總兵官沐璘璘遣使諭歸之而與以底麻之地
四年罕落法襲父職族人構難落法避於孟艮遣人赴
總兵官求救璘以聞詔左參將胡誌調兵撫諭之與其
族人部衆設盟而還然落法猶避居孟都不敢歸孟都
蠻者地近隴川歲調蠻兵二百更番護之天順元年鎮

守中官羅珪奏罕落法與所部交攻遣人求援臣等議
委南寧伯毛勝都督胡誌量調官軍相機勦捕帝以非
犯邊疆不許二年落法奏為思坑曩罕弄等所攻乞兵
勦除命總兵官區處六年總兵官沐瓚奏罕落法屢侵
隴川地欲以撥守貴州兵八千調回防禦詔留其半成
化十年木邦所轄孟密蠻婦曩罕弄等侵掠隴川黔國
公沐琮以聞曩罕弄者故木邦宣慰罕揲法之女嫁其
孟密部長思外法地有寶井罕揲法卒孫落法嗣曩罕

弄以尊屬不樂受節制嗾族人與爭景泰中叛木邦逐

宣慰據公署殺掠鄰境隴川孟養兵力日盛自稱天娘

子其子思柄自稱宣慰黔國公琮奏委三司官往撫曩

罕弄驕蹇不服且欲外結交陞兵逼脅木邦八百諸部

琮等復以聞兵部尚書張鵬主用兵詔廷臣集議皆以

孟密與木邦仇殺並未侵犯邊境止宜撫諭因命副都

御史程宗馳傳與譯者序班蘇銓往時成化十八年也

踰年孟密思柄遣人入貢宴賜如土官例已孟密奏為

木邦所擾乞別設安撫司張鵬以太監覃平御史程宗撫馭已有成緒遂命宗巡撫雲南敕平偕詣金齒勸諭之其孟密地或仍隸木邦或別設安撫區處具奏初曩罕弄竊據孟密貳於木邦畏鄰境不平遣人從間道抵雲南至京獻寶石黃金乞開設治所直隸布政司閣臣萬安欲許之劉珏劉吉皆以孟養舊木邦屬蠻今曩罕弄叛而請命於朝若許之則土官誰不解體蘇銓私以告於宗宗復奏曩罕弄與木邦仇殺已久勢難再合已

喻諸蠻示以朝廷德意宥其罪開設衙門令還其所侵地皆踴躍奉命木邦亦已允服乞遂行之部覆從之二十年遂設孟密安撫司以忠柄為使時孟密據寶井之利資為結納而木邦為孟密所侵兵力積弱不能報雖屢奏訴竟不得直云弘治二年雲南守臣奏孟密曩罕弄先後占奪木邦地二十七處又誘其頭目放卓孟等叛其勢必盡吞後已乞敕八百宣慰司俾與木邦和好互相救援亦敕木邦宣慰收復人心親愛骨肉勿使孟

密得乘間誘叛自致孤弱如孟密聽諭方許曩罕弄孫承襲報可并敕雲南守臣親詣金齒曉諭復降敕詰責前鎮巡官所以受賂召侮啟釁者三年追論致仕南京工部尚書程宗罪先是宗以右副都御史奉命率蘇銓往撫諭而銓受思柄金紹宗奏為設孟密安撫司銓復教思柄偽歸木邦地而占據如故思柄益橫至是木邦宣慰罕完法發其事時宗已致仕巡按請追罪之獄具帝以事在赦前不問六年雲南守臣奏孟密侵奪木邦

兵連禍結垂四十餘年屢撫屢叛勢愈猖肆請調兵往討兵部議以孟密安撫初隸布政司今改隸木邦以致爭殺仍如初隸可息兵從之初孟密之復叛木邦也因木邦宣慰罕挖法親迎婦於孟乃寨孟密土舍思標乘虛襲之據木邦誘降其頭目高答落等聚兵阻路罕挖法不得歸依孟乃寨者三年於是巡撫張誥等會奏議遣文武大員詣孟密撫諭思標猶不服誥乃遣官督率隴川南甸干崖三宣撫司積糧開道示以必征之勢又

令漢土官舍耀兵以威之高答落等懼謀歸罕它法思
標欲殺之罕它法乞救於鄰部調土兵合隴川等三宣
撫兵至蠻遮共圍之思標懼乃罷兵誥等奏其事且乞
賞有功者兵部議罕它法雖還木邦思標猶未悔罪必
令插血同盟歸地獻叛永息爭端乃可論功行賞報聞
九年罕它法及思標各遣使來貢報賜如例初思標圍
蠻遮木邦宣慰妻求救於孟養思陸孟密素畏思陸之
兵聞其將至遂解去木邦與思陸謀共取孟密於是蠻

中之患又在孟養矣自萬安程宗勘處失宜諸酋長紛紜進退中國用兵且數十年嘉靖初思陸子思倫與木邦宣慰罕烈同擊殺緬酋莽紀歲而分其地後莽瑞體強將修怨於木邦隆慶二年木邦土舍罕拔告襲有司索賂不為請拔怒與弟罕章集兵梗往來道商旅不前而已食鹽亦乏絕乞於緬緬以五千贏餽之自是反德緬攜金寶象馬往謝之瑞體亦厚報之歡甚約為父子瑞體死子應裏用岳鳳言誘拔殺之時萬曆十一年也

拔子進忠守木邦應裏遣弟應龍襲之其孽子罕鳳與
耿馬舍人罕虔欲禽進忠獻應龍進忠攜妻子內奔虔
等追至姚闕焚順寧而去十二年官軍破緬於姚闕立
其子欽欽死其叔罕禱約暹羅攻緬緬恨之三十四年
緬以三十萬衆圍其城請救於內地不至城陷罕禱被
擄緬僞立孟密思禮領其衆事聞黜總兵官陳賓木邦
遂亡孟密自思柄授安撫繼之者曰思標曰思真真年
至百十歲嘉靖中土舍兄弟爭襲走訴於緬緬人為立

其弟改名思忠忠遂以其地附緬萬厯十三年忠齎偽
印來歸命授為宣撫已而復投緬乃以其母罕烘代掌
司印緬攻孟密罕烘率子思禮從子思仁奔孟廣而孟
密遂失十八年緬復攻孟廣罕烘思禮奔隴川思仁奔
工回而孟廣又失先是思仁從罕烘奔孟廣時有甘線
姑者思忠妻也思忠既投緬思仁通於線姑遂欲妻之
而罕烘不許至是罕烘攜線姑走隴川思仁奔雅蓋率
兵象犯隴川欲擄線姑去會隴川有備弗克思仁亦走

歸緬緬偽署思仁於木邦食其地初孟密寶井朝廷每以中官出鎮司採辦武宗朝錢能最橫至嘉靖隆慶時猶然萬歷二十年巡撫陳用賓言緬酋擁衆直犯蠻莫其執詞以奉開採使命令殺蠻莫思正以開道路全滇之禍皆自開採啟之時稅使楊榮綬其下以開採為名恣暴橫蠻人苦之且欲令麗江退地聽採緬酋因得執詞深入巡按宋興祖極言其害請追還榮等帝皆不納凡採辦必先輸官然後與商賈貿易每往五六百人其

屬有地羊寨在孟密東往來道所必經人工幻術採辦
人有強索其飲食者多腹痛死已有所乘馬斃剖之則
馬腹皆木石也思真嘗勦之殺數千人不得絕至是復
議勦以兵少中止

孟養蠻名迤水有香柏城元至元中於孟養置雲遠路
軍民總管府洪武十五年改為雲遠府其地故屬平緬
宣慰司平緬思倫發為其下所逐走京師帝命西平侯
沐春以兵納之還故地成宗即位改雲遠府為孟養府

以土官刀木旦為知府永樂元年刀木旦遣人貢方物
及金銀器賜賚遣歸二年改陞軍民宣慰使司以刀木
旦為使賜誥印四年孟定與戛里相仇殺緬甸宣慰那
羅增乘釁劫之殺刀木旦及子思欒發而據其地事聞
詔行人張洪等齎敕諭責緬那羅增懼仍歸其境土會
木邦宣慰使罕賓發以那羅增侵據孟養請自發兵討
遂破緬甸城寨二十餘獲其象馬獻京師十四年復設
孟養宣慰使命刀木旦次子刀得孟為使以木旦姪玉

實為同知自木旦被害司遂廢孟養之人從玉賓散居
干崖金沙江諸處者三千餘人朝廷嘗命玉賓署宣慰
使以撫之故仍命為本司同知令其率衆復業十五年
刀得孟遺使貢馬及方物宣德五年刀玉賓奏伯父刀
木旦被殺蒙朝廷遣官訪玉賓授同知又阻於緬難寄
居金齒者二十餘年今孟養地又為麓川宣慰思任發
所據乞遣兵送歸本土帝命黔國公沐晟遣還之然其
地仍為任發所有時為孟養宣慰者名刀孟賓亦寄居

雲南及任發敗奔緬甸子機發潛匿孟養求撫十三年
敕孟養頭目伴送思機發來朝許以陞賞機發疑畏竟
不至帝以孟養宣慰頭目刀變蠻等匿機發敕數其罪
曰孟養乃朝廷開設爾刀變蠻等敢違朝命一可伐思
機發係賊子故縱不捕二可發爾孟養被思任發奪地
逐爾宣慰見在雲南優養爾等與仇為黨三可伐雲南
總兵官世世管屬爾地奉命討取賊子爾等不從調度
四可伐爾等不過以為山川險阻官軍未易遽到又以

為氣候瘴癘官軍不可久居勢強則拒敵力弱則奔遁
殊不知昔馬援遠標銅柱險阻無傷諸葛亮五月渡瀘
炎蒸無害皆能破滅蠻衆開拓境土況今大軍有必勝
之機麓川之師可為前鑒爾等速宜悔過自圖令思機
發親自前來仍與一官一地令享生全如不肯出爾等
即禽為上策迹思機發所在報與官軍捕取為中策若
代彼支吾令其逃匿則并爾等勦滅悔無及矣時已三
征麓川內旨必欲生禽機發已密諭總督王驥又敕諭

以雲南安置舊宣慰刀慰刀孟賓為嚮導及兵出窮征
機發卒遁去不可得於是乃以孟養地給緬甸宣慰馬
哈省管治命捕思機發時正統十四年也景泰二年機
發之子思卜發遣使來貢求管孟養舊地廷臣議孟養
地已與緬甸豈可移易時朝命雖不許然卜發已潛據
之即緬甸不能奪也卜發死子思洪發嗣自天順成化
每朝貢輒署孟養地名儼然自有其地矣成化中孟養
金沙江思陸發遣人貢象馬宴賜皆如例思陸發者思

任發之遺孽也太監錢能鎮雲南思陸發數以珍寶遺能因得入貢稱孟養金沙江思陸發常規立功以襲祖職適孟密安撫土舍思樸侵據木邦地爭殺累年守臣議征之思陸發乃請自效時蠻衆相傳孟密畏思陸兵參政毛科請於總兵鎮巡官許之思陸兵未至思樸解去巡撫張誥議調思陸兵令戮力捕思樸乃遣使促之發兵思陸遣大陶孟倫索領蠻兵象馬過江倫索既過江指鷹謂使者曰我曾猶此鷹奪得土地即管食之耳

科聞之憂甚時思棟令陶孟思英以兵守蠻莫孟養兵
至思英堅守不出已而請和孟養兵聞官軍聽思英約
降頗有怨言官軍糧絕遂引退倫索亦恐思英絕其歸
路取道干崖而還科念倫索前語急戒令孟養還兵守
疆界孟養不聽初靖遠伯王驥與之約誓非總兵官符
檄不得渡江自是遂犯約數興兵過江與孟密戰弘治
十二年雲南巡按謝朝宣奏孟養思陸本麓川叛種竄
居金沙江外成化中嘗據緬甸之聽蓋弘治七年徵調

其兵渡江遂復據騰衝之蠻莫又糾木邦兵攻燒孟密
安撫司殺掠蠻民二千餘人劫象馬金寶有并吞孟密
覬覦故土之志迺西人恭們騰衝人段和為之謀主屢
撫不聽雲南會城去孟養遠聲勢難接曩於金騰添設
鎮守太監為撫蠻安民之計而近時太監吉慶貪暴無
狀雖嘗陽却思陸之志然蠻知其貪又烏知不因其却
而更進之臣聞蠻莫等處乃水陸會通之地蠻方器用
咸自此出江西雲南大理逋逃之民多赴之雲南差官

每多齎違禁物往彼餽送漏我虛實為彼腹心鎮夷關
一巡檢耳安能禁制臣計孟養甲兵不能當中原一大
縣以雲南之勢臨之易於壓卵奈何一調即來屢撫不
靖皆鎮巡失之於初遁逃奸人謀之於中撫蠻中官壞
之於後伏望垂念邊民困苦將雲南鎮守太監止存一
員別用指揮一員守備鎮夷關驅思陸退歸江外而移
騰衝司於蠻莫并木邦孟密不得窺伺乃為萬全之策
設思陸冥頑不聽撫諭便當決策用兵使無噍類以為

土官不法之戒先是吉慶已為思陸請朝貢至是因朝宣疏并下鎮巡官議勦捕之宜數年不決十六年巡撫陳金乃遣金騰參將盧和巡諭思陸和至騰衝思陸遣陶孟投書致方物和諭以禍福令掣兵過江歸所占蠻莫等地且調隴川千崖南甸三宣撫司蠻兵及戰象隨官軍分道至金沙江思陸乃遣大陶孟倫索怕卓等率所部來見和等再申諭之思陸聽命退還前所據蠻莫等地十三處撤回象馬蠻兵渡金沙江而歸又遣陶孟

招剛等貢象六銀六百兩并金銀器納款鎮巡官以聞
并奏言蠻莫地方原隸木邦成化間始為孟密所有近
又為思陸所據連年構禍今始平定既不可復與木邦
孟密又不可割界隴川干崖南甸三宣撫宜暫於騰衝
歲檄官軍四百分番守之思陸前有助平思標功今悔
禍納款請賜以名目冠帶仍降敕獎諭部議以蠻莫等
處本木邦分地在大義宜歸之木邦其名目冠帶貢使
已言思陸不願受不宜輕畀請賜敕厚勞遣歸之報可

時思陸覬得宣慰司印部執不予於是仍數出兵與木
邦孟密仇殺無寧歲嘉靖七年總兵官沐紹勛巡撫歐
陽重遣參政王汝舟等徧歷諸蠻諭以禍福孟養思倫
等各願貢象牙土錦金銀器退地贖罪乃以蠻莫等十
三處地方寬廣諸蠻歷年所爭屬之騰衝司檄軍輪守
則烟瘴可虞屬之木邦則地勢遼遠蠻心不順莫若仍
屬孟密管領歲徵差發銀一千兩而割孟乃等七處仍
歸木邦罕烈則分願均而怨爭息矣報可萬歷五年雲

南巡按陳文燧言孟養思箇與緬世仇今更歸順於緬因引弘治朝先臣劉健嘗議孟養事狀謂思陸有官猶可制即無官其僭自若也不如因而官之以抗緬報可十一年緬為遊擊劉綏所敗孟養思威亦殺緬使降於綏十三年隴川平乃於孟養立長官司未幾長官司真復為緬所擄部長思遠奉思真妻來歸給以冠帶令歸守思遠乘亂自立為宣慰貢象進方物然遠暴虐諸部恨之引緬兵至聲言還思真思遠奔盞西有思轟者內

附與蠻莫酋思正共據險抗緬三十年緬攻思正轟率
兵倍道馳救至則正已被殺三十二年緬攻入迤西轟
走死緬以頭目思華守其地華死妻怕氏代理緬人更
番戍守連年征伐從行甚苦曰孟養不亡蠻何得至此
轟之後曰放思祖有衆千餘不敢歸寄食於干崖云舊
制宣慰遣人俱稱頭目唯木邦及緬甸又有陶孟及招
剛等稱孟養又有招八稱皆見於奏章因其俗不改
車里即古產里為倭沙貂獫諸蠻雜居之地古不通中

國元世祖命將烏蘭濟達伐交趾經所部降之置撒里
路軍民總管府領六甸後又置耿凍路耿當孟弄二州
洪武十五年蠻長刀坎來降改置車里軍民府以坎為
知府坎遣姪豐祿貢方物詔賜刀坎及使人衣服綺幣
甚厚以初奉貢來朝故也十七年復遣其子刀思拂來
貢賜坎冠帶鈔幣改置軍民宣慰使司以坎為使二十
四年子刀暹答嗣遣人貢象及方物二十八年以賜誥
命謝恩予賜皆如例永樂元年刀暹答令其下剽掠威

遠知州刀算黨及民人以歸西平侯沐晟請發兵討帝
命晟移文諭之如不悛即以兵繼又以車里已納威遠
印是悔過之心已萌不必加兵晟使至遲答果懼還刀
算黨及威遠之地遣人貢馬謝罪帝以其能改過宥之
自是頻入貢朝廷遣內官往車里者道經八百大甸為
宣慰刀招散所阻三年刀遲答遣使請舉兵攻八百帝
嘉其忠八百伏罪勅車里班師復加獎勞四年遣子刀
典入國學實陰自納質帝知其隱賜衣幣慰諭遣還以

道里遼遠命三年一貢著為令十一年暹答卒長子刀
更孟自立驕很失民心未幾亦卒更孟長子霸羨年幼
衆推刀賽署司事刀賽者更孟弟刀怕漢也怕漢死妻
以前夫子刀弄冒為暹答孫請襲十五年命刀弄襲宣
慰使以刀孟從弟刀雙孟為本司同知十九年雙孟言
刀弄屢以兵侵劫蠻民乞別設治所以撫其衆詔分其
地置靖安宣慰使司陞雙孟為宣慰使命禮部鑄印給
之宣德三年雲南布政司奏刀弄雙孟相仇殺弄棄地

投老撾請差官招撫帝命黔國公沐晟計議六年晟奏
請奉命招討刀弄其母具言布政司差官劉亨徵差發
金亨已取去本司復來徵蠻民因而激變逐弄弄逃入
老撾尋還境內以死未嘗棄地外投亦未嘗與雙孟仇
殺帝命法司執劉亨等罪之七年車里土舍刀霸羨請
襲許之遣行人陸垧齎敕賜冠帶襲衣九年靖安宣慰
刀霸供言靖安原車里地今析為二致有爭端乞仍併
為一歲貢如例帝從其請草靖安宣慰仍歸車里命刀

霸供刀靳羨共為宣慰使俾上所授靖安宣慰司印正
統五年命貢使齎敕及綺帛歸賜刀霸羨及妻嘉其勤
修職貢也六年麓川宣慰思倫發叛詔給車里信符金
牌命合兵勦賊景泰三年以刀霸羨奉調有功免其積
欠差發金天順元年總兵官沐璘奏刀霸羨自殺弟板
雅忠等已推兄三寶歷代承職今板雅忠又作亂糾合
八百相仇殺帝命璘亟為撫諭并勅奏應襲者二年帝
以三寶歷代者雖刀更孟之子乃庶孽奪嫡謀害刀霸

羨致板雅忠借兵攻殺不當襲但蠻民推立姑從衆願
命襲宣慰使成化十六年交趾黎灝叛頒偽敕於車里
期會兵共攻八百車里持兩端雲南守臣以聞遣使敕
車里諸土官互相保障勿懷二心二十年復敕車里等
部慎固封疆防交人入寇不得輕與文移啟釁納侮嘉
靖十一年緬酋莽應裏據擺古蠶食諸蠻車里宣慰刀
糯猛折而入緬有大小車里之稱以大車里應緬而以
小車里應中國萬歷十三年命沅江土舍那恕往招糯

猛復歸獻馴象金屏象齒諸物謝罪詔受之聽復職天
啟七年巡撫閩洪學奏緬人侵孟艮孟艮就車里求救
宣慰刀韞猛遣兵象萬餘赴之緬人以此恨車里興兵
報復韞猛年已衰重賂求和緬聞韞猛子召河璇有女
名召烏岡色美責獻烏岡河璇別以女詒之緬知其詐
大憤攻車里愈急韞猛父子不能支遁至思毛地緬追
執之以去中朝不及問車里遂亡

老撾俗呼為撾家古不通中國成宗即位老撾土官刀

線反貢方物始置老撾軍民宣慰使司永樂二年以刀
線反為宣慰使給之印五年遣人來貢既而帝以刀線
反潛通安南黎薜遣使詰責諭其悔過六年刀線反遣
人貢象馬方物七年進金銀器犀象方物謝罪自是連
年入貢皆賚予如例帝遣中官楊琳往賜文綺十年來
貢命禮部加賜馬宣德六年遣使賚敕獎諭宣慰刀線
達九年老撾貢使還恐道中為他部所阻給信符敕孟
艮車里諸部遣人護之景泰元年請賜土官衣服故事

無加賜衣服者命加賜錦幣并及其妻成化元年頒金牌信符於老撾七年鑄給老撾軍民宣慰使司印以皆為賊焚燬也十六年貢使至會安南攻老撾鎮守內官錢能以聞因敕其使兼程回并量給道里費明年安南黎灝率兵九萬開山為三道進兵破哀牢入老撾境殺宣慰刀枝雅及其子二人其季子怕雅賽走八百宣慰刀攬那遣兵送至景坎黔國公沐琮以聞命怕雅賽罷父職免其貢物一年賜冠帶綵幣以示優卹既怕雅賽

欲報安南之仇覲中國發兵為助帝以老撾交趾皆服屬中國久恤災解難中國體也令琮慎遣人諭之弘治十一年宣慰舍人招攬章應襲職遣人來貢因請賜冠帶及金牌信符賚賞如制其金牌信符俟鎮巡官勘奏至日給之十一月招攬章遣使入貢吏部言招攬章係舍人未授職僭稱宣慰使雲南三司官冒奏違錯宜治罪宥之嘉靖九年招攬章言交趾應襲長子光紹為叔所逐出亡老撾欲調象馬送回守臣言據招攬章之言

懼納亡之罪且假我為制服之資留之啓釁遣之招兵
宜聽光紹自歸并責其私納罪報可二十四年雲南巡
撫汪文盛言老撾土舍怕雅聞征討安南守先思奮且
地廣兵多可獨當一面八百車里與老撾相近孟艮在
老撾上流皆多兵象可備征討請免其察勘就令承襲
以備征調從之四十四年土舍怕雅蘭章遣人進舞牌
牙象二母象三犀角十雲南守臣以聞禮部以非貢期
且無漢緬公文第來路險遠跋涉踰年宜受其所貢給

賞遣之母令赴京報可時緬勢方張剪除諸部老撾亦折而入緬符印俱失萬厯二十六年緬敗老撾來歸奉職貢請頒印命復鑄老撾軍民宣慰使司印給之四十年貢方物言印信燬於火請復給撫鎮官以聞明年再頒老撾印時宣慰猶貢象及銀器給席賜予如例自是不復至云其俗與木邦同部長不知姓有三等一曰招木弄一曰招木牛一曰招木化而為宣慰者招木弄也代存一子絕不嗣其地東至水尾南至交趾西至八百

北至車里西北六十八程至雲南布政司

八百世傳部長有妻八百各領一寨因名八百媳婦元
初征之道路不通而還後遣使招附元統初置八百等
處宣慰司洪武二十一年八百媳婦國遣人入貢遂設
宣慰司二十四年八百土官刀板冕遣使貢象及方物
先是西平侯沐英遣雲南左衛百戶楊完者往八百招
撫至是來貢帝諭兵部尚書茹瑋曰聞八百與百夷構
兵仇殺無寧日朕念八百宣慰遠在萬里外能修職奉

貢深見至誠今與百夷構兵當有以處之可諭意八百
令練兵固守俟王師進討自是及永樂初頻遣使入貢
賜予如例永樂二年設軍民宣慰使司二以土官刀招
你為八百者乃宣慰使其弟刀招散為八百大甸宣慰
使遣員外郎左洋往賜印誥冠帶襲衣刀招散遣人貢
馬及方物謝恩命五年一朝貢是歲遣內官楊瑄齎敕
諭孟定孟養等部道經八百大甸為土官刀招散所阻
弗克進三年遣使諭刀招散曰朕特頒金字紅牌敕諭

與諸邊為信以禁戢邊吏生事擾害用福爾衆諸宣慰
皆敬恭聽命無所違禮惟爾年幼無知惑於小人孟乃
朋孟允公等啟釁生禍使臣至境拒却不納廷臣咸請
興師問罪朕念八百之人豈皆為惡兵戈所至必及無
辜有所不忍茲特遣司賓田茂推官林楨齋敕往諭爾
能悔過自新即將奸邪之人禽送至京庶境土可保其
或昏迷不悛發兵討罪孥戮不貸并敕西平侯沐晟嚴
兵以待以馬軍六百步軍一千四百護內官楊安郁斌

前往又慮老撾乘車里空虛或發兵掩襲或與八百為援可遣其部長率兵一萬五千往備三年乃招你等遣使奉金縷表文貢金結絲帽及方物帝命受之仍加賜予西平侯沐晟奏奉命率師及車里諸宣慰兵至八百境內破其猛利石崖及者答二寨又至整線寨木邦兵破其江下等十餘寨八百恐遣人詣軍門伏罪乃以所陳詞奏聞因遣使敕諭車里木邦等曰曩者八百不恭朝命爾等請舉兵誅討嘉爾忠誠已從所請今得西平

侯奏言八百已伏罪納款夫有罪能悔宜赦宥之敕至其悉止兵勿進遂敕晟班師四年降敕誡諭刀招散刀招散遣人貢方物謝罪帝以不誠却之五年貢使復來謝罪命禮部受之洪熙元年遣內官洪仔生齎敕諭刀招散宣德七年遣人來貢因奏波勒土酋常糾土雅之兵入境殺掠乞發兵討之帝以八百大甸去雲南五千餘里波勒土雅皆未聞歸化勞中國為遠蠻役非計止降敕撫諭而已正統五年八百貢賜奏遞年進貢方物

士民不識禮法不通漢語乞依永樂間例仍令通事齎捧金牌信符催督進貢驛路令軍卒護送庶無踈失從之十年給八百大甸宣慰司金牌信符各一以前所給牌符為暹羅國寇兵焚燬也成化十七年安南黎灝已破老撾頒偽敕於車里期會兵攻八百其兵暴死者數千傳言為雷所震八百因遣兵扼其歸路襲殺萬餘交人敗還土官刀攬那以報黔國公沐琮奏攬那能保障生民擊敗交賊救護老撾交人嘗以偽敕脅誘八百八

百燬敕以象蹴之請頒賞以旌忠義帝命雲南布政司
給銀百兩綵幣四表裏以獎之二十年刀攬那遣人入
貢雲南守臣言交兵雖退宜令八百諸部飭兵為備弘
治二年刀攬那孫刀整頓貢方物求襲祖職兵部言八
百遠離雲南瘴毒之地宜免勘予襲從之仍給冠帶其
地東至車里南渡勒波西至大古喇與緬鄰北至孟艮
自姚關東北行五十程始至平川數千里有南格刺山
下有河南屬八百北屬車里好佛惡殺寺塔以萬計有

見侵乃舉兵得仇即已俗名慈悲國嘉靖間為緬所并
其酋避居景線名小八百自是朝貢遂不至緬酋應裏
以弟應龍居景邁城倚為右臂焉萬歷十五年八百大
甸上書請恢復不報初四譯館通事惟譯外國而緬甸
八百如之蓋二司於六慰中加重焉

明史卷三百十五

欽定四庫全書

明史卷三百十五考證

緬甸傳後卓吉為思真壻猛乃頭目別混所殺

臣章

宗瀛按思真孟養長官也是時為緬所擄見孟養土
司本傳謹附識

緬甸傳既覘知有備

臣章宗瀛按是時朝議用沐朝

弼請於蠻哈設兵備緬見蠻司合誌所謂有備者指
此謹附識

緬甸傳罕拔又為緬招干崖土舍刀怕文許代其兄職
臣章宗瀛按怕文兄怕舉妻罕拔妹也拔使據干
崖以臣緬許以其嫂妻之並代其兄職怕文怒挾二
子詣同知薛衛守備李騰霄訴之與俱戰見明紀事
本末謹附識

緬甸傳岳鳳喙應裏殺罕拔盡俘其衆 臣章宗瀛按
是時罕拔子進忠守木邦應裏遣弟應龍襲之追進
忠於喳哩江進忠挈妻子內奔見明紀事本末謹附

識

緬甸傳且窺騰衝永昌大理蒙化景東鎮沅諸郡

臣

章宗瀛按是時應裏西會孟養孟密蠻莫隴川兵於
猛卯東會車里八百孟艮木邦兵於孟炎見蠻司合
誌所謂會兵入犯者指此謹附識

緬甸傳岳鳳及其子皆伏誅

臣章宗瀛按是時諸部

蠻多視岳鳳為向背綏等欲借以招諸蠻處之金沙
江上游故諸部俱殺緬使來歸而中朝不察日索獻

俘十二年冬岳鳳父子伏誅諸部旋復解散陰附於
緬而應裏復披猖矣見蠻司合誌謹附識

緬甸傳緬帥思仁寇蠻莫敗之

臣章宗瀛按思仁即

孟密土舍思忠從弟也歸於緬緬偽署之於孟密二
十一年思仁率衆三十萬衆百據蠻莫思化敗走二
十二年陳用賓遣參將王一麟等復之至是復入寇
又大敗之見識大錄謹附識

南甸傳乞置四巡檢司鎮之

臣章宗瀛按南甸四巡

檢司設於木縛雷傍哈丘壠磨孟倫等處見一統志
謹附識

茶山長官司傳

臣章宗瀛按茶山長官司傳未詳其

置自何時考地理志稱永樂五年析孟養地置屬金

齒軍民司一統志稱土酋早姓舊屬孟養永樂三年

孟養叛蠻目早章憤其不忠遂不附五年詣闕賜印

綬為長官具建置年代與志合謹附考

里麻長官司傳

臣章宗瀛按里麻地理志作麻里互

異考明實錄及通志諸書皆作里麻則地里志之誤也謹附考

木邦傳罕落法襲父職族人構難落法避於孟更 臣

章宗瀛按是時落法罕族罕捐法者欲推落法叔罕逆襲乃扶頭目刀板放等聚衆謀殺法落落法遂奔見蠻司合誌謹附識

木邦傳孟都蠻者 臣章宗瀛按一統志木邦本名孟都則是孟都即木邦地此別之曰孟都蠻未識何據

謹附考

木邦傳曩罕弄驕蹇不服

臣章宗瀛按成化初南寧

伯毛勝貪猛密寶石許得自貢不關木邦而太監錢能直就徵其地自是曩罕弄益縱恣無忌見蠻司合志謹附識

木邦傳遂命宗巡撫雲南

臣章宗瀛按宗乘傳至滇

即大言孟密宜開設巡撫吳誠有難色宗叱之曰爾敢與內廷抗耶遂率鎮守及三思會勘杖木邦訴民

而犒孟密使者踰南牙山就見曩罕弄曲徇所請見
明紀事本末謹附識

木邦傳於是巡撫張誥等會奏

臣章宗瀛按是時誥

遣參政毛科副使荆茂詣孟密撫諭見識大錄謹附
考

木邦傳忠齋偽印來歸命

臣章宗瀛按思忠等之歸

命也朝命以思忠為孟密宗撫思化為猛哈同知思
順為蠻莫安撫比信符至而思忠等已復投緬矣見

明實錄謹附識

孟養傳成祖即位改雲遠府為孟養府

臣章宗瀛按

地理志稱洪武十五年改雲遠路為府十七年改為

孟養府後廢洪武三十五年十二月復置此以改稱

孟養屬之成祖即位時互異謹附考

孟養傳十四年復設孟養宣慰司

臣章宗瀛按永樂

九年五月孟養宣慰刀玉養來朝貢馬賜賚如例見

明實錄傳未載謹附識

孟養傳思陸發者

臣章宗瀛按明紀事本末及識大

錄諸書法者蠻酋自大之稱內地遂訛法為發故傳中或稱發或僅稱思陸他傳似此者甚多謹仍其舊而附識於此

孟養傳因得入貢稱孟養金沙江思陸發

臣章宗瀛

按弘治改元年頒徼外酋以金牌信符時孟養宣慰已廢而兵部誤以舊號頒給思陸思陸遂誑諸蠻曰天朝復我官矣諸蠻信之勢遂日盛見明紀事本末

謹附識

孟養傳官軍糧絕遽引退

臣章宗瀛按是時誥遣兵

備副使趙炯分守參議黃東山左參政毛科調官民
兵萬二千人防護科炯會騰衝東山先之隴川儲糧
科會炯發孟養兵又增發隴川南甸千崖三宣撫兵
欲藉此挾撫以成功科營憂勒河西炯營具東東山
因與炯議不合畱止千崖戒各倉毋與軍士糧而科
復以失火燬營喪軍器千數引兵駐南牙山與孟養

兵會比思英堅守不出復遣人諭之乃與約降是時
軍無糧採芭蕉心以食迨引退皆饑疫且聞蠻莫追
者在後自相蹂踐死者無筭見明實錄傳所載未詳
謹附識

孟養傳孟養思倫等各願貢象牙土錦金銀器
呂章
宗瀛按思倫即思陸子也見蠻司志合謹附識

車里傳改置車里軍民府
臣章宗瀛按車里軍民宣
慰使司之置地理志作洪武十九年與此異明實錄

仍作十七年與此合謹附考

老撾傳既而帝以刀線夕潛通安南黎季犛遣詰責

臣章宗瀛按永樂二年安南故王陳日烺弟陳天平

為黎季犛所迫竄走考撾考撾遣送至關見明實錄

謹附識

明史卷三百十五考證



總校官編修臣吳紹濬

欽定四庫全書薈要

史部
明史卷三百十六

詳校官中書臣劉源溥



欽定四庫全書薈要卷六千九百九

史部

明史卷三百十六

大學士張廷玉等奉 敕修

列傳第二百四

貴州土司

貴州古羅施鬼國漢西南夷牂牁武陵諸旁郡地元置
八番順元諸軍民宣慰使司以羈縻之明太祖既克陳
友諒兵威遠振思南宣慰思州宣撫率先歸附即令以

故官世守之時至正二十五年也及洪武五年貴州宣慰霽翠與宋蒙古反及普定府女總管適爾等先後來歸皆予以原官世襲帝方北伐中原未遑經理南荒又田仁智等歲修職貢最恭順乃以衛指揮僉事顧成築城以守賦稅聽自輸納未置郡縣永樂十一年思南思州相仇殺始命成以兵五萬執之送京師乃分其地為八府四州設貴州布政使司而以長官司七十五分隸焉屬戶部置貴州都指揮使領十八衛而以長官司七

隸焉屬兵部府以下參用土官其土官之朝貢符信屬
禮部承襲屬吏部領土官者屬兵部其後府并為六州
并為四長官司或分或合釐革不一其地西接滇蜀東
連荆粵太祖於平滇詔書言霫翠輩不盡服之雖有雲
南不能守也則志已在滇至成祖遂成之然貴州地皆
崇山深箐鳥道蠡叢諸蠻種類嗜淫好殺畔服不常霫
翠歸附之初請討其隴居部落帝曰中國之兵豈外蠻
報怨之具及仁智入朝帝諭之曰天下守土之臣皆朝

廷命吏人民皆朝廷赤子汝歸善撫之使各安其生則
汝可長享富貴夫禮莫大於敬上德莫盛於愛下能敬
能愛人臣之道也二十一年部臣以貴州逋賦請帝曰
蠻方僻遠來納租賦是能遵聲教矣逋負之故必由水
旱之災宜行蠲免自今定其數以為常從寬減焉二十
九年清水江之亂既平守臣以賊首匿宣慰家宜並罪
帝曰蠻人鴟張鼠伏自其常態勿復問明初御蠻之道
其後世之龜鑑也夫

貴陽

思南 思州附

鎮遠

銅仁

黎平

安順

都勻

平越

石阡

新添 金筑安撫司附

貴陽府舊為程番長官司洪武初置貴州宣慰司隸四川永樂十一年改隸貴州成化十二年置程番府隆慶三年移程番府為貴陽府與宣慰司同城府轄城北司

轄城南明萬厯改為貴陽軍民府領安撫司一曰金筑
領長官司十八曰貴竹曰麻嚮曰木瓜曰大華曰程番
曰韋番曰方番曰洪番曰卧龍番曰金石番曰小龍番
曰羅番曰大龍番曰小程番曰上馬橋曰盧番曰廬山
曰平伐其貴州宣慰司所領長官司九曰水東曰中曹
曰青山曰劉佐曰龍里曰白納曰底寨曰乖西曰養龍
坑自蜀漢時濟火從諸葛亮南征有功封羅甸國王後
五十六代為宋普貴傳至元阿畫世有土於水西宣慰

司靄翠其裔也後為安氏洪武初同宣慰宋蒙古反來
歸賜名欽俱令領原職世襲及設布政使司而宣慰司
如故安氏領水西宋氏領水東八番降者皆令世其職
六年詔靄翠位各宣慰之上靄翠每年貢方物與馬帝
賜錦綺鈔幣有加十四年宋欽死妻劉淑貞隨其子誠
入朝賜米三十石鈔三百錠衣三襲時靄翠亦死妻奢
香代襲都督馬煜欲盡滅諸羅代以流官故以事撻香
激為兵端諸羅果怒欲反劉淑貞聞止之為走懇京師

帝既召問命淑貞歸招香賜以綺鈔十七年奢香率所屬來朝并訴煜激變狀且願効力開四鄙世世保境帝悅賜香錦綺珠翠如意冠金環襲衣而召曙還罪之香遂開偏橋水東以達烏蒙烏撒及容山草塘諸境立龍場九驛二十年香進馬二十三匹每歲定輸賦三萬石子安的襲貢馬謝恩帝曰安的居水西最為誠恪命禮部厚賞其使二十五年的來朝賜三品服并襲衣金帶白金三百兩鈔五十錠香復遣其子婦奢助及其部長

來貢馬六十六匹詔賜香銀四百兩錦綺鈔幣有差自是每歲貢獻不絕報施之隆亦非他土司所敢望也二十九年香死朝廷遣使祭之的貢馬謝恩正統七年水西宣慰安隴富自陳祖父以來累朝皆賜金帶臣蒙恩受職乞如例從之時宋誠之子斌年老以子昂代昂死然代十四年賜敕隴富母子嘉其調兵保境之功隴富頗驕天順三年東苗之亂富不時出兵聞朝廷有意督之乃進馬謝罪賜敕警之富死姪觀襲觀老子貴榮襲

巡撫陳儀以西堡獅子孔之平由觀與子貴榮統部衆
二萬攻白石崖四旬而克家自餽餉口不言功特給觀
正三品昭勇將軍誥初安氏世居水西管苗民四十八
族宋氏世居貴州城側管水東貴竹等十長官司皆設
治所於城內銜列左右而安氏掌印非有公事不得擅
還水西至是總兵官為之請許其以時巡歷所部趣辦
貢賦聽暫還水西以印綬宣慰宋然代理貴榮老請以
子佐襲命賜貴榮父子錦紵先是宋然貪淫所管陳湖

等十二馬頭科害苗民致激變而貴榮欲并然地誘其衆作亂於是阿朵等聚衆二萬餘署立名號攻陷塞堡襲據然所居大羊腸然僅以身免貴榮據以狀上冀令已按治之會阿朵黨洩其情官軍進討貴榮懼乃自率所部為助及敵平貴榮已死坐追奪然坐斬然奏世受爵土負國厚恩但變起貴榮而身臨重辟乞分釋因從末減依土俗納粟贖罪都御史請以貴筑平伐七長官司地設立府縣皆以流官撫理巡撫覆奏以蠻民不願

遂寢宋氏亦遂衰子孫守世官衣租食稅聽征調而已
時安萬鍾應襲驕縱不法漢民張純土目烏掛等導之
游獵酒酣輒射人為戲又嘗撻其左右為所殺無子其
從弟萬鎰宜襲鎰以賊未獲辭烏掛等遂以疎族幼子
普者冒萬鍾弟曰萬鈞告襲承勘官入其賄遂暫委萬
鍾妻奢播攝事萬鎰悔不立而恨烏掛之主謀也遂以
兵襲烏掛烏掛亦發兵相仇殺皆以萬鍾之死為辭巡
按上其狀以萬鎰宜襲但以烏掛相誣訐宜各宥輸贖

而梟殺萬鍾者并戍純等受其賄者亦罰治詔如之未
幾萬鎰死子阿寫幼命以萬銓借襲萬銓有助平阿向
功提督尚書伍文定為之請萬銓亦自陳其功乞加參
政銜賜蟒衣帝命賜以應得之服後阿寫長襲職改名
仁未幾死子國亨襲淫虐乃以事殺萬銓之子信信兄
智與其母別居於安順州聞之因告國亨反巡撫王諍
遽請發兵誅國亨智遂為總兵安大朝畫策且約輸兵
糧數萬及師至陸廣河智糧不至諍乃令人諭國亨而

止大朝毋進兵已渡河為國亨所敗國亨懼大誅遣使
哀辭乞降朝廷未之許巡撫阮文中至檄捕諸反者密
使語國亨亟出諸奸徒割地以處安智母子還所費兵
糧朝廷當待汝以不死於是國亨悉聽命帝果赦不誅
而命國亨子民襲國亨事起於隆慶四年至萬曆五年
乃以國亨既草任日遣人至京納賂為起復地十三年
播州宣慰楊應龍以獻大木得賜飛魚服國亨亦請以
大木進乞還給冠帶誥封如播例既而木竟不至乃諉

罪於木商上怒命奪所賚國亨請補貢以明不欺上仍
如所請萬歷二十六年國亨子疆臣襲職會播州楊應
龍反疆臣亦以戕殺安定事為有司所案科臣有言其
逆節漸萌者詔不問許殺賊圖功疆臣奏稱播警方殷
臣心未白上復優詔報之巡撫郭子章許疆臣以應龍
平後還播所侵水西烏江地六百里以酬功於是疆臣
兵從沙溪入有蜚語水西佐賊者總督李化龍檄詰之
疆臣遂執賊二十餘人率所部奪落濠關至大水田焚

桃溪莊應龍伏誅初應龍之子以內難走水西客死宣
慰萬銓挾之索水煙天旺地聽還葬其地遂為水西所
據及播州平分其地為遵義平越二府分隸蜀黔以渭
河中心為界總督王象乾代化龍命疆臣歸所侵播州
地子章奏言侵地始於萬銓而非疆臣安氏迫取於楊
相喪亂之時非擅取於應龍蕩平之日且臣曾許其裂
土今反奪其故地臣無面目以謝疆臣願罷去象朝疏
言疆臣征播殲應龍子惟棟不實首功可知至佯敗棄

陣送藥往來欺君助逆迹已昭然令還侵地不咎既往已屬國家寬大若因其挾而予之彼不為恩我且示弱疆臣既無功不與之地正所以全撫臣之信宜留撫臣罷臣以為重臣無能與巖爾苗疇沓者之戒於是清疆之議累年不決兵部責令兩省巡按御史勘報而南北言官交章詆象乾貪功起釁科臣呂邦耀復劾子章納賄縱奸子章求去益力象乾執疆臣所遣入京行賄之人與金以聞於朝然議者多右疆臣尚書蕭大亨遂主

巡按李時華疏謂征播之役水西不惟假道且又助兵
矧失之土司得之土司播固輸糧水亦納賦不宜以土
地之故傷字小之仁地宜歸疆臣於是疆臣增官進秩
其母得賜祭水西尾大之患亦於是乎不可制矣三十
六年疆臣死弟堯臣襲四十一年烏撒土舍謀逐安効
良堯臣以追印為名領兵數萬長驅入滇直薄霑益州
所過焚掠備極慘毒朝廷方以越境擅兵欲加堯臣罪
而堯臣死子位幼命其妻奢社輝攝事社輝永寧宣撫

奢崇明女弟崇明子寅獷悍與社輝爭地相仇恨而安
邦彥者位之叔父也素懷異志陰與崇明合及崇明反
調兵水西邦彥遂挾位叛以應之位幼弱不能制邦彥
更招故宣慰土舍宋萬化為助率兵趨畢節陷之分兵
破安順平壩霑益而萬化亦率苗仲九股陷龍里遂圍
貴陽自稱羅甸王時天啟元年二月也巡撫李樞方受
代聞變與巡按御史史永安悉力拒守賊攻不能克則
沿巖制柵斷城中出入鎮將張彥芳將兵二萬赴援隔

龍里不得進貴州總兵楊愈懋推官郭象儀與賊戰於江門而死外援既絕攻益急城中糧盡人相食而拒守不遺餘力中朝方急遼不之省已以王三善為巡撫倉卒調兵食大會將士分兵三道進三日抵龍頭營屢敗賊兵遂奪龍里邦彥聞新撫自將大兵數十萬懼甚遂退屯龍洞前鋒楊明楷率烏羅兵擊死安邦俊遂乘勝抵貴陽城下先以五騎傳呼曰新撫至矣舉城懽呼更生貴陽被圍十餘月城中軍民男婦四十萬至是餓死

幾盡僅餘二百人詳李璵及三善傳中貴陽圍既解邦
彥遠遁陸廣河外三善遣使諭社輝母子縛邦彥以降
大軍至者日益衆三善欲因糧於敵又諸軍視賊過易
楊明楷營於三十里外邦彥復糾諸苗來攻師敗明楷
為所執邦彥勢復張合衆欲再圍貴陽三善遣兵三路
禦之破生苗寨二百餘禽萬化等焚其積聚數萬龍里
定番四路竝通諸苗畔者相繼降邦彥氣奪不敢出於
鴨池陸廣諸要地掘塹屯兵為自守計時奢崇明為蜀

兵所敗計窮投水西與邦彥合三年三善督兵攻大方賊巢禽土司何中尉等進營紅崖連破天台水脚等七圍奪其天險別將亦破賊於羊耳追至鴨池河奪其戰象遂深入至紅鳥岡諸苗奔潰三善率兵直入大方奢社輝安位焚其巢窟火灼堡邦彥奔織金位遂遣人赴鎮遠乞降於總督楊述中許之令禽崇明父子自贖一意主撫而三善責并獻邦彥當并用勸議不合往返間已逾數月邦彥得益兵為備三善糧不繼焚大方還貴

州道遇賊三善為所害邦彥率數萬衆來追總理魯欽
力禦之大戰數日大軍無糧乘夜皆潰欽自到賊燒劫
諸堡苗兵復助逆貴陽三十里外樵蘇不行城中復大
震初大方東倚播北倚蘭相為犄角後播蘭既平賊惟
恃烏撒為援而畢節為四裔交通處當三善由貴陽陸
廣深入大方百七十里皆獠鬼巢窟以失地利而陷天
啟間朱爕元為蜀督建議滇兵出霑益遏安効良應援
分兵於天生橋尋甸等處以絕其走蜀兵臨畢節扼其

交通之路而別出龍場巖後以奪其險黔兵由普定渡
思臘河徑趨邦彥巢由陸廣鴨池擣其虛粵西兵出泗
城分道策應然後大軍由遵義鼓行而前尋以憂去未
及用總督閔夢得繼之亦以貴州抵大方路險賊惟恃
畢節一路外通我兵宜從永寧始自永寧而普市而摩
泥而赤水百五十里皆坦途赤水有城郭可憑而守宜
結營進逼四十里為白巖六十里為層臺又六十里為
畢節畢節至大方不及七十里賊必併力來禦須重兵

扼之斷其四走之路然後遵義貴陽尅期而進亦不果
用及是黠事棘詔起爕元總督貴雲川廣於是爕元再
泣默時崇禎元年也奢崇明自號大梁王安邦彥自號
四裔大長老其部衆悉號元帥悉力趨永寧先犯赤水
爕元授意守將佯北誘深入度賊已抵永寧分遣別將
林兆鼎從三岔入王國貞從陸廣入劉養鯤從遵義入
邦彥分兵四應力不支羅乾象復以奇兵繞其背急擊
之賊大驚潰崇明邦彥皆授首邦彥亂七年而誅爕元

乃移檄安位赦其罪許歸附位豎子不能決其下謀合潰兵來拒燮元扼其要害四面迭攻斬首萬餘級復得嚮導輒發害粟就食賊益饑復遣人至大方燒其室廬位大恐遂率四十八日出降燮元奏請許之報可而前助邦彥故宣慰宋萬化之子嗣殷亦至是始勦滅乃以宋氏洪邊十二馬頭地置開州建城設官燮元復遣兵平擺金五洞諸叛苗水西勢益孤十年安位死無嗣族屬爭立朝議欲乘其敝郡縣之燮元奏未可驟乃傳檄

土目諭以威德諸苗爭納土獻印乃分水西地授諸苗
長及有功漢人貴陽甫定而明亦旋亡矣

思南即唐思州宋宣和中番部田祐恭內附世有其地
元改宣慰司明洪武初析為二宣慰屬湖廣永樂十一
年置思南府領長官司四曰水德江曰蠻夷曰沿河祐
溪曰朗溪思州領長官司四曰都坪峨異溪曰都素曰
施溪曰黃道溪初太祖起兵平偽漢畧地湖南思南宣
慰使田仁智遣都事楊琛來歸附并納元所授宣慰誥

帝以率先來歸俾仍為思南道宣慰使以三品銀印給之并授琛為宣撫使思州宣撫使田仁厚亦遣都事林憲萬戶張思溫來獻鎮遠古州軍民二府婺川功水常寧等十縣龍泉瑞溪沿河等三十四州於是命改思州宣撫為思南鎮西等處宣慰使司以仁厚為使俱歲朝貢不絕二年仁厚死子弘正襲帝以思南土官世居荒服未嘗詣闕詔令率其部長入朝九年仁智入覲加賜織金文綺并諭以敬上愛下保守爵祿之道仁智辭歸

至九江龍城驛病卒有司以聞遣官致祭并敕送柩歸
思南時思州田弘正與其弟弘道等來朝帝命禮部皆
優賜十一年仁智子大雅襲奉表謝恩命思南收集各
洞弩手二千人備征調十四年大雅入朝十八年思州
諸洞蠻作亂命信國公湯和等討之時寇出沒不常聞
師至輒竄山谷間退則復出剽掠和等師抵其地恐蠻
人驚潰乃令軍士於諸屯分屯立柵與蠻人雜耕使不
復疑久之以計禽其魁餘黨悉定留兵鎮之二十年移

思南宣慰於鎮遠大雅來謝恩思州宣慰弘正死子琛
襲三十年大雅母楊氏來朝永樂八年大雅死子宗鼎
襲初宗鼎兇暴與其副使黃禧構怨奏訐累年朝廷以
田氏世守其土又先歸誠曲與保全改禧為辰州知府
未幾思州宣慰田琛與宗鼎爭沙坑地有怨禧遂與琛
結圖宗鼎構兵琛自稱天主禧為大將率兵攻思南宗
鼎挈家走琛殺其弟發其墳墓并戮其母屍宗鼎訴於
朝屢敕琛禧赴闕自辨皆拒命不至潛使奸人入教坊

司伺隙為變事覺遣行人蔣廷瓚召之命鎮遠侯顧成以兵壓其境執琛禧械送京師皆引服琛妻冉氏尤强悍遣人招誘臺羅等寨苗普亮為亂冀朝廷遣琛還招撫以免死帝聞而錮之以宗鼎窮蹙來歸得末減令復職還思南而宗鼎必得報怨以絕禍根帝以宗鼎幸免禍不自懲乃更逞忿亦留之宗鼎出誹言因發祖母陰事謂與禧奸實造禍本祖母亦發宗本縊殺親母瀆亂人倫事帝命刑部正其罪諭戶部尚書夏原吉曰琛宗

鼎分治思州思南皆為民害琛不道已正其辜宗鼎滅
倫罪不可宥其思州思南三十九長官司可更設郡縣
貴州布政使司總轄之命顧成勦臺羅諸寨成斬苗賊
普亮思州乃平十二年遂分其地為八府四州貴州為
內地自是始兩宣慰廢田氏遂亡正統初蠻夷長官司
奏土官衙門婚姻皆從土俗乞頒恩命帝以土司循襲
舊俗因親結婚者既累經赦宥不論繼今悉依朝廷禮
法違者罪之景泰間思南府奏府四面皆山關隘五處

無城可守乞發附近土軍修築命巡撫王來經畫之
鎮遠故為豎眼大田溪洞元初置鎮遠沿邊溪洞招討
使後改為鎮遠府洪武五年改為州隸湖廣永樂十一
年仍置府屬貴州領長官司二曰偏橋曰邛水十五洞
領縣二曰鎮遠曰金容金達楊溪公俄二長官司地曰
施秉即施秉長官司地也洪武二十年土官趙士能來
朝貢馬三十年鎮遠鬼長箐等處苗民作亂指揮萬繼
百戶吳彬戰死都指揮許能率兵會偏橋衛軍擊敗之

衆散走永樂初鎮遠長官何惠言每歲修治清浪焦溪
鎮遠三橋工費浩大所部臨溪部民皆狎獷猫狽力不
勝役乞令軍民參助從之宣德初鎮遠邛水與洞蠻苗
章奴刼掠清浪道中為思州都坪峩異溪長官司所獲
其父苗銀總刼取之聚兵欲攻思州因令赤溪洞長官
楊通諒往撫銀總伏兵殺通諒又掠埂洞命總兵官蕭
授調辰沅諸衛兵萬四千人勦之會於清浪衛指揮張
名討銀總克奧洞盡殲殺其黨銀總遁正統三年草鎮

遠州以鎮遠施秉二長官司隸鎮遠府十二年巡按御史虞禎奏貴州蠻賊出沒撫之不從捕之不得若非設策難以控制臣觀清水江等處峭壁層崖僅通一徑出入彼得恃險為惡若將江外山口盡行閉塞江內山口并津渡俱設關堡屯兵守禦又擇寨長有才幹者為辦事官庶毋疎虞從之十四年命振偏橋衛以被苗寇殺掠不能自存有司以請從之天順七年鎮守湖廣太監郭閔奏貴州洪江賊苗蟲蝦等糾合二千餘人偽稱王

侯攻刼鎮遠生寨撫諭不服請合兵進討命總兵官李震李安等分道入賊退守平坤寨官兵追至清水江獲蟲蝦并斬賊首飛天侯苗老底額頭等六百四十餘人并復黎平之赤溪洞洞賊平弘治十年改鎮遠金容金達長官司為鎮遠縣設流官時土官何倫父子罪死土人思得流官守臣以聞報可萬歷末邛水長官司楊光春貪暴土目彭必信濟之箕斂苗不堪將上訴改設流官光春與必信遂謀反言官兵欲勦諸苗當斂金贖得

金五百餘都御史何起鳴訶知之捕光春下獄瘐死於
是每四戶擇壯兵一人立四哨不為兵者佐糗糧魚鹽
簡土吏何文奎等掌之必信復醵諸苗金訴於朝言已
也梁止諸寨為亂指揮使陶效忠不問反索土官楊光
春金而殺之改舊例用新法不便上書意自得歸謁知
府王一麟一麟縛之下獄檄諸苗言若等十五洞所苦
者以兵餉月米三斗過甚耳然歲給白蟲鋪米每洞月
八斗他於平溪驛剩餘徵銀兩皆可足餉我為若通之

母為必信所誣苗皆悅服乃坐必信罪時有土舍楊載清者應襲推官嘗中貴州鄉試命於本衛加俸級優異之天啟五年巡撫傅宗龍奏苗寇披猖地方受害乞敕偏沅撫臣移鎮偏橋勿復回沅凡思石偏鎮等處俾練兵萬餘人平時以之勦苗大征即統為督臣後勁庶苗患寧而西賊之氣亦漸奪矣報可

銅仁元為銅人大小江等處軍民長官司洪武初改為銅仁長官司永樂十一年置銅仁府萬歷二十六年始

改銅仁長官司永爲縣治領長官司五曰省溪曰提溪
曰大萬山曰烏羅曰平頭著可烏羅者本永樂時分置貴
州八府之一也所屬有朗溪長官司答意長官司治古
長官司而平頭著可長官司亦隸焉宣德五年烏羅知
府嚴律已言所屬治古答意二長官石各野等聚衆出
沒銅仁平頭瓮橋諸處誘脅蠻賊石雞娘并算子坪長
官吳畢郎等共爲亂招撫不從緣其地與鎮溪酉陽諸
蠻接境恐相煽爲亂請調官土軍分據要地絕其糧道

且捕且撫事平之後宜置衛所巡司以守之事聞命總
兵官蕭授及鎮巡諸司議於是授築二十四堡環其地
守之兵力分卒難扞禦賊四出劫掠殺清浪衛鎮撫葉
受勢益獷七年巡按御史以聞且言生苗之地不過三
百餘里乞別遣良將督諸軍殄滅授言殘苗吳不爾等
遁入草子坪結生苗龍不登等攻劫湖廣五寨及白崖
諸寨為患滋甚宜令川湖貴州接境諸官軍土兵分路
併力攻勦庶除邊患從之既降敕諭授言暴師久恐蹉

跌為蠻羞或撫或勦朕觀成功不從中制八年授奏言
臣受命統率諸軍進攻賊勦破新郎等寨前後生禽賊
首吳不跳等二百一十二人斬吳不爾王老虎龍安軸
等五百九十餘級皆梟以徇餘黨悉平還所掠軍民男
婦九十八口悉給所親獲賊婦女幼弱一千六百餘口
以給從征將士并械吳不跳等獻京師帝顧謂侍臣曰
蠻苗好亂自取滅亡然於朕心不能無惻然也授威服
南荒前後凡二十餘年正統三年草烏羅府所屬治古

答意二長官司亂後殘民無幾亦并革之以烏羅平頭
著可隸銅仁以朗溪隸思南從巡按御史請也景泰七
年平頭著可長官司奏其地多為蠻賊侵害乞立土城
固守從之成化十一年總兵官李震奏烏羅苗人石全
州妄稱元末明氏子孫僭稱明王糾衆於執銀等處作
亂隣洞多應之因調官軍征勦石全州已就禽而諸苗
攻劫未已命鎮巡官設策撫捕未幾平嘉靖二十二年
平頭苗賊龍桑科作亂流劫湖廣桂陽間甚獷帝以諸

苗再叛責激亂者而起都御史萬鍾往討之明年鍾奏
叛苗以次殄滅惟龍母叟雖降然其罪大宜置重典命
安置遼東未幾龍子賢復叛二十六年湖貴巡按御史
奏官軍討賊不力降旨切責三十九年總兵官石邦憲
勦之禽首惡龍老羅等遂平

黎平元潭溪地也洪武初仍各長官司永樂十一年改
置黎平新化二府宣德十年并新化入黎平領長官司
十三曰潭溪曰八舟曰洪舟泊里曰曹滴洞曰古州曰

西山陽洞曰湖耳曰亮寨曰歐陽曰新化曰中林驢洞
曰赤溪南洞曰龍里初洪武三年辰州衛指揮劉宣武
率兵招降湖耳潭溪新化萬平江歐陽諸洞於是諸洞
長官皆來朝納元所授印敕帝命皆仍其原官以轄洞
民隸辰州衛既改龍里長官司為龍里衛又增立五開
衛以鎮之隸思州二十九年清水江蠻金牌黃作亂都
司發兵捕之金牌黃遁去捕獲其黨五百餘人械至京
以其脅從宥死戍遠衛既有言金牌黃匿宣慰家者詔

勿問三十年古州洞蠻林寬者自號小師聚衆作亂攻
龍里千戶吳得鎮撫井孚力戰死之寬遂犯新化突至
平茶千戶紀達率壯士擊之達突陣殺數人以鎗橫挑
一人擲之流矢中臂達拔矢復戰賊驚曰是平茶紀蒙
邪遁去蠻稱官為蒙云已復熾命湖廣都指揮使齊讓
為平羌將軍統兵五萬征之既以讓逗遛命楊文代之
又命楚王楨湘王柏各率護衛軍進討城銅鼓衛未幾
讓禽寬等械入京誅之三十一年復平其餘黨并俘獲

三十岡等處洞蠻二千九百人以歸遂班師永樂五年
寨長韋萬木來朝自陳所統四十七寨乞設官因設西
山陽洞長官司以萬木為屯長宣德六年改永從蠻夷
長官司為永從縣置流官以土官李瑛絕故也又割思
州新溪等十一寨隸黎平赤溪浦洞長官司正統四年
計砂苗賊苗金蟲等糾合洪江生苗偽立統千侯統萬
侯名號劫掠四出命都督蕭授調兵勦之賊首苗總牌
等為都督吳亮所戮洪江生苗遂詣軍門降授諭遣之

命千戶尹勝誘執苗金蟲斬以徇景泰五年巡撫王永壽以苗賊蒙能攻圍龍里新化銅鼓諸城乞發兵勦之時賊欲取龍里為巢穴攻破亮寨銅鼓羅圍堡諸城都指揮汪迪為賊所殺朝議以南和伯方瑛為平蠻將軍統湖廣諸軍討之蒙能糾賊衆三萬出攻平溪衛瑛遣指揮鄭泰等以火鎗攻斃賊三千人能亦死而能黨李珍等尚煽惑苗衆官軍計禽之克復銅鼓藕洞連破鬼板等一百六十餘寨覃洞上陸諸苗悉降天順五年鎮

守太監阮讓言東苗為貴州諸苗之首負固據險僭號稱王逼脅他種東苗平則諸苗服臣會同方瑛計議并請師期於是頒諭四川湖廣諸宣慰宣撫會師討賊三年督理軍務副都御史白圭以谷種山箐乃東苗羽翼宜先勦因同瑛進青崖命總兵李貴進牛皮箐參將劉玉進谷種參將李震進鬼山所向皆捷克水車壩等一百四十七寨諸將復合兵青崖攻石門山克擺傷等三十九寨仍分兵四路進攻董農竹蓋甲底等四百三十七

寨賊首千把豬退守六美山合兵大進斬五千餘級生禽千把豬送京師伏誅先是麻城人李添保以逋賦逃入苗中詭稱唐後聚衆萬餘僭稱王建元武烈署故賊首蒙能子聰為總兵官遺之銀印敕書縱兵剽掠震動遠近至是為李震所敗餘賊大潰添保僅以身免潛入鬼池及蛟洞諸寨復煽諸苗劫攻中林龍里亦為震禽伏誅萬歷二十八年皮林逆苗吳國佐石纂太等作亂國佐本洪州司特洞寨苗頗知書嘗入永從學為生員

素桀黠皮林諸苗推服之因娶叛人吳大榮妾為黎平府所持遂反自稱天皇上將陽聽撫而陰與播賊通纂太亦僭稱太保殺百戶黃鐘等百餘人與國佐合兵圍上黃堡參將黃冲霄討之敗績殺守備張世忠焚五開破永從縣圍中潮所總兵陳良玘陳璘合湖貴兵進討亦失利國佐益橫二十九年命巡撫江鐸會兵分七路進勦苗據險不出陳璘潛師奪隘縱火焚其巢國佐逃禽之纂太亦為他將誘縛皆伏誅

安順普里部蠻所居元世祖置普定府成宗時改普定路又為普安路竝屬雲南洪武初為普定府十六年改為安順州隸四川正統三年改屬貴州萬歷中改安順軍民府以普安等州屬焉普安故軍民府也初隸雲南尋廢為衛永樂間改為州始隸貴州領長官司二曰寧谷曰西堡洪武五年普定府女總管適爾及其弟阿甕來朝遂命適爾為知府許世襲六年設普定府流官二員十四年城普定十五年普定軍民知府者額來朝賜

米及衣鈔命諭其部衆有子弟皆令入國學十六年者
額遣弟阿昌及八十一砦長阿窩等來朝二十年詔徵
普定安順等州六長官赴京命以銀二十萬備糴遣普
定侯陳桓等率諸軍駐普安屯田明年越州叛苗阿資
率衆寇普安燒府治大肆剽掠征南將軍傅友德擊走
之旦詣軍門降遂改軍民府為指揮使司二十三年西
平侯沐英奏普安百夫長密即叛殺屯田官軍及驛丞
試百戶調指揮張泰討之於盤江木窄關官軍失利更

調指揮蔣文統烏撒畢節永寧三衛軍勦之乃遁二十
六年普定西堡長官司阿德及諸寨長作亂命貴州都
指揮顧成討平之二十八年成討平西堡土官阿傍三
十一年西堡滄浪寨長必莫者聚衆亂阿草傍等亦糾
三千餘人助惡成皆擊走之其地悉平永樂元年故普
安安撫者昌之子慈長言建文時父任是職宜襲吏部
罷之本境地濶民稠輸糧三千餘石乞仍前職報效命
仍予安撫十三年改普安安撫司為普安州十四年慈

長謀占營長地且強娶民人妻為妾殺其夫閹其子事
聞命布政司孟驥按狀慈長糾兵萬餘圍驥驥以計禽
之逮至京死於獄天順四年西堡蠻賊聚衆焚劫鎮守
貴州內官鄭忠右副總兵李貴請調川雲都司官兵二
萬并貴州宣慰安隴富兵二萬進勦至阿果禽賊首楚
得隆等斬首二百餘級餘賊奔白石崖復斬級七百餘
焚其巢而還十年安順土知州張承祖與所屬寧谷寨
長官顧鐘爭地仇殺下巡撫究治命各貢馬贖罪成化

十四年貴州總兵吳經奏西堡獅子孔洞等苗作亂先
調雲南軍八千助防守聞雲南已警乞改調沅州清浪
諸軍應援十五年經奏已禽斬賊首阿叱堅婁等以捷
聞弘治十二年普安州土司官隆暢妾米魯反米魯者
霑益州土知州安民女也適暢被逐居其父家暢老前
妻子禮襲父子不相能米魯與營長阿保通因令阿保
諷禮迎已禮與阿保同烝之暢怒殺禮燬阿保寨阿保
挾魯與其子阿紇莫等攻暢暢走雲南時東寧伯焦俊

為總兵官與巡撫錢鉞和解之魯於道中毒暢死遂與保據寨反暢妾曰適烏生二子別居安南衛米魯欲竝殺之築寨圍其城又別築三寨於普安而令阿鮓莫等防守名所居寨曰承天自號無敵天王出入建黃纛官兵不能制鎮巡以聞發十衛及諸土兵萬三千人分道進責安民殺賊自贖民乃攻斬阿保父子於查刺寨米魯亡走焦俊等責安民獻魯民陰資魯兵五百襲殺適烏及其二子據別寨殺掠又自請襲為女土官鎮巡官

皆受魯賂請宥魯嚴旨切責必得魯乃已貴州副使劉福陰索賂於魯故緩師賊益熾官兵敗於阿馬坡都指揮吳遠被擄普安幾陷帝命南京戶部尚書王軾巡撫陳金都指揮李政進勦破二十餘寨魯竄馬尾籠官兵圍之就禽伏誅安民自辨得赦正德元年暢族婦適擦襲土判官赴京朝貢帝嘉之或曰適擦亦暢妾云西堡阿得獅子孔阿江二種皆獐獠也初據滄浪六寨不供常賦土官溫愷懼罪自縊其子廷玉請免賦不允往徵

為其寨長乜呂等所殺六年廷玉弟廷瑞訴於守臣會
也呂死指揮楊仁撫其衆巡撫蕭紳請令其輸賦免用
兵從之

都勻元曰都雲洪武十九年置都勻安撫司二十九年
改為軍民指揮使司屬四川永樂十七年改隸貴州弘
治七年置府領州二曰麻哈曰獨山即合江洲陳蒙燦
土長官司地領縣一曰清平長官司地也領長官司八
屬司八屬府者曰都勻曰平浪曰邦水曰平洲六洞屬

獨山者曰九名九姓曰豐寧屬麻哈者曰樂平曰平定
洪武二十二年都督何福奏討都勻叛苗斬四千七百
餘級禽獲六千三百九十餘人收降寨洞一百五十二
處二十三年城都勻衛命指揮同知董庸守之二十五
年九名九姓蠻亂命何福平之二十八年豐寧三藍等
寨亂命顧成平之二十九年平浪蠻殺土官王應名都
指揮程暹平之應名妻吳攜九歲子阿童來訴詔予襲
永樂四年鎮遠侯顧成招諭合江州十五寨來歸宣德

元年平浪賊紀那阿魯等占副長官地殺掠葉果諸寨
招諭不聽詔蕭授平之七年陳蒙爛土副長官張勉奏
所司去衛遠地連古州生苗與廣西僚洞近化從寨長
韋翁同等煽亂乞立堡并請調泗城州土兵一千鎮守
從之九年翁同糾下高大刀蠻合廣西賊韋萬良等恣
殺掠指揮陳原討禽萬良等三人翁同遂聽撫而樂昌
蔡郎等四十寨仍聚眾拒敵總兵蕭授遣指揮顧勇進
討平之成化十四年陳蒙爛土長官司張鏞奏天壩干

賊首齋果侵掠請於所侵大陳大步等寨設一司隸安
寧宣撫而豐寧長官司楊泰亦奏峰峒陸光翁等聚爛
土為亂先是宣慰楊輝平天壩干後即灣溪立安寧宣
撫司爛土諸苗惡其逼已至是果等既攻陷天漂遂圍
豐寧時輝已致仕子愛承襲力弗支求援於川貴二鎮
各奏聞命仍起輝會兵討之十六年鏞復奏齋果糾合
九姓豐寧并荔波賊萬人攻剽愈亟帝責諸守臣玩寇
於是巡撫謝杲言自天順四年以來諸苗攻劫舟溪等

處不靖至今乃命鎮守太監張成總兵吳經相機勦撫
二十年爛土苗賊龍洛道僭號稱王聲言犯都勻清平
諸衛豐寧長官楊泰與土目楊和有隙誘廣西泗城州
農民九千於鎮坑等一百餘寨殺掠於是苗患愈盛弘
治二年苗賊七千人攻圍楊安堡都指揮劉英統兵覘
之為所困命鎮巡官往援乃得出五年命鎮遠侯顧溥
率官兵八萬人巡撫鄧廷瓚提督軍務太監江德監諸
軍往征之七年諸軍分道進勦令熟苗詐降於賊誘令

入寇伏兵禽之直擣其巢凡破一百十餘寨以捷聞於是開置都勻府及獨山麻哈二州正德三年都勻長官司吳欽與其族弟敏爭襲仇殺鎮巡以聞言欽之祖賴洪武間立功為長官陣亡子琮幼弟貴署之及琮長仍襲傳至欽三世敏不得以貴故妄稱詔可之嘉靖十五年平浪叛苗王聰攻奪凱口壘執參將李佑等初王阿向先世為土官為王仲武先人所奪至阿向與仲武爭印煽亂總兵楊仁巡撫陳克宅平之斬阿向等盡逐其

黨以地屬都勻府改名滅苗鎮仲武因諸苗失業因為
招復旋科索之諸苗不勝怨遂推阿向餘孽王聰王佑
為主巡按楊芳春遣李佑等撫諭之賊質佑等乞還土
田官印乃釋佑春芳以聞詔巡撫調官軍三萬人集壘
下壘故絕險其要害處置弩樓疊石為防攻之三月不
克復調宣慰安萬銓兵合勦萬銓力戰破賊聰等皆伏
誅前後斬首二百六十餘級降苗寨一百五十餘男婦
二萬餘口捷聞敘功賞賚有差又有黑苗曰天漂者在

湖貴川廣界與者亞鼎足居萬歷六年天漂請內附都御史遣指揮郭萬恩及長官金篆往問狀而阻於者亞乃遠從丹彰間道通天漂會苗坪黨銀等亦以格於者亞不得通都御史王緝遣使責者亞部長阿斗斗願歸附平定緝謂斗故養善牌部何故欲屬平定必有他謀下吏按驗果得實蓋欲往平定借諸蒙兵襲養善皆內地奸人天金貴等導之遂治金貴罪以者亞仍屬養善路遂通於是苗坪天漂皆請奉貢賦比編氓名其地曰

歸化隸都勻府凡使命往來自生齒以上悉跪拜迎送
夾騶從行前吹蘆笙唱蠻歌呼導而馳事聞帝嘉之越
七年者亞阿斗以反誅乃罷樂平吏目設麻哈州州判
一員令居樂平司以養鵠者亞羊腸諸苗屬之初者亞
阿斗反答干寨阿其應之斗誅阿其屢犯順十四年土
舍吳楠王國聘慮阿其叵測禍及已請以答干雞賈甲
多諸寨屬蒙詔立宣威營歲輸賦獨阿其不服引者亞
殘苗圖宣威營大譟曰此我地誰令爾營此蒙詔常徵

秋稅阿其度使至以血釁門令勿通居常張繖鼓角繪
龍鳳器遂與雞賈甲多仰枯諸苗擊牛酒為誓劫歸化
官兵不敢近獨山土吏蒙天眷願以兵進勦乃使人佯
言漢已黜蒙詔令以宣威營地還阿其旦暮撒兵去矣
阿其乃親馳樂邦牛場訶視言人人同遂弛備天眷驟
入斬阿其雞賈甲多皆降其屬蒙詔者自答于雞賈甲
多外有唐蛙當井斗坡等十七寨小橋熟苗龍木恰視
寨事年老子倭襲頒糧者遂不及恰恰輒奪倭之有以

為養俸訴於官官逮問恰非罪之也恰輒鎖漢使已而
逐之曰速去此我家事再來我當以烏雞諸寨踐漢邊
矣官以計禽之死獄中無何龍化龍羊山苗引川苗作
亂曰漢無故殺苗苗請報之官軍戰不利既而都司蔡
兆吉招諭令降待以不死於是諸苗皆散俸視事如故
四十三年平州長官楊進雄兇惡土人苦之雄無子以
兄繼祿子珂為後既生子治安而疎珂珂怨雄雄乃奪
珂財產并其父逐之珂頗得民心遂為亂據唐宿堽攻

雄雄敗走屠其家各上疏訐奏詔推問都御史趙錢以
雄不法逮之獄檄獨山土酋蒙繼武諭珂歸命許改土
為流以安之治安計不便乃陰許以六洞賂繼武借兵
繼武乃發兵攻珂復平州珂走廣西之泗城繼武遂屯
耕六洞地六洞民不服復助珂與繼武相攻珂復據平
州巡撫吳岳招降其父繼祿六洞乃安

平越古黎峨里元為平月長官司洪武十四年置衛十
七年改為軍民指揮使司屬四川萬歷中始置府屬貴

州領州一曰黃平即黃平安撫司地領縣三曰湄潭曰
甕安即甕水草塘二安撫司地曰餘慶即白泥餘慶二
長官司地領長官司二曰凱里曰楊義初洪武八年貴
州江力江松刺回四十餘寨苗把具播共桶等連結苗
獠二千作亂平越安撫司乞兵援命指揮同知胡汝討
之九年黃平蠻獠都麻堰亂宣撫司捕之不克千戶所
以兵討之亦敗乃命重慶諸衛合擊大破之平其地十
九年平越衛麻哈苗楊孟等作亂命傅友德平之時麻

哈長官宋成陣歿命其子襲二十二年察隴牛場乾溪
苗亂傅友德平之二十三年命延安侯唐勝宗往黃平
平越鎮遠貴州諸處訓練軍士提督屯田相機勦寇正
統末鎮遠蠻苗金臺偽稱順天王與播州苗相煽亂遂
圍平越新添等衛半年城中糧盡官兵逃者九千餘人
貴州東路閉時王驥征麓川班師過其地不之顧景泰
元年命保定伯梁瑄佩平蠻將軍印督師進勦大破之
平八十餘寨禽賊首王阿同等平越諸衛圍乃解二年

都御史王來奏貴州苗韋同烈聚衆於興隆之截洞復
攻平越清平等衛梁瑑自沅州發兵由東路都督方瑛
由西路合兵興隆擊破之同烈退保香爐山瑛由龍場
都督陳友由萬潮山都督毛福壽由重安江攻破黎樹
翁滿等三百餘寨斬三千餘級招撫衮水等二百餘寨
合兵香爐山下衆縛同烈降械至京五年副總兵李貴
奏黎從等寨賊首阿弩王阿傍苗金虎等偽號苗王與
銅鼓諸賊相應乞加兵七年巡撫蔣林奏勦苗賊於平

越斬四百餘級其阿傍等據車梳寨仍為亂於清平平
越地方殺指揮王杞據香壚山掠偏橋正德十三年命
巡撫秦金斬之初黔楚之交羣苗嘯聚連寨相望而香
鑪山周迴四十里高數百尋四面陡絕其上平行向為
叛苗巢穴阿傍等據之糾諸寨苗作亂巡撫鄒文盛總
兵官李昂等分漢土兵為五克其前柵密遣人援崖先
登殺賊守路者衆蟻附而上焚賊巢禽阿傍餘賊猶堅
守不下參將洛忠等詭言招撫自山後擊之殲焉遂移

師龍頭黎蘭等寨悉破之賊遂平天啟四年凱里土司楊世慰叛合安邦彥兵與平茶羣苗來修怨復窺香爐山搖動四衛梗塞糧運總督楊述中檄總兵魯欽馳至清平相機進勦調副使顏欲章等為後援欽督將領攻破巖頭分遣朗溪司田景祥截平茶賊援用藥弩及礮殺傷賊衆賊乘夜遠遁自是不敢再窺鑪山四衛得安石阡本思州地永樂十一年置府隸貴州領長官司四曰石阡曰苗民曰葛彰曰商曰龍泉坪宣德六年葛彰

葛商長官安民奏前以官鈔糴糧儲備令蠻民守視溪洞險僻無所支用恐歲久腐爛賠納甚難請以充有司祭祀過使廩給之用從之萬歷中改龍泉坪為縣

新添衛故麥新地也宋時克麥新地乃改為新添元置衛二十九年置新添衛軍民指揮使司領長官司五曰新添曰小平伐曰把平寨曰丹平曰丹行洪武五年春新添安撫宋亦憐真子仁來朝其秋平伐蘆山山木等砦長來降是時新屬歸附叛服不常凡蠻人諸寨分據

屢煩征討七年平伐谷霞谷浪等苗攻劫的教諸寨指揮僉事張岱討之代攻谷峽刺向關破之追至的教大破之禽的令的若而還蠻大驚永樂二年置丹行丹平二長官宣德元年新添土舍宋志道糾蠻洞肆掠蕭授討禽之九年丹行土舍羅朝煽誘寨長卜長洞民羅阿記等侵占卧龍番長官龍保地又攻猺平寨焚劫時苗民素憚指揮李政尚書王驥因奏遣政往撫諭景泰二年苗賊有在新添行劫聚於西廬者官軍破之以聞成

化九年以旱災免新添衛糧萬歷三十四年貴州巡撫
郭子章討平貴州苗斬獲苗長吳老喬阿倫阿皆等十
二人招降男婦甚衆先是東西二路苗民曰仲家者盤
踞貴龍平新之間為諸苗渠帥其在水硯山介於銅仁
思石者曰山苗紅苗之羽翼也窺黔自平播後財力殫
竭有輕漢心經年剽掠無虛日子章奏討之命相機進
兵子章乃命總兵陳璘參政洪澄源率官軍五千益以
土兵五千攻水硯山監軍布政趙健率宣慰土兵萬人

使遊擊劉岳等督之及兩路會師皆九十餘日而克二
寇既平專命總兵陳璘率漢土兵五千移營新添進攻
東路苗不一月復克其六箐諸苗盡平

金筑安撫司洪武四年故元安撫密定來朝貢馬詔賜
文綺三匹置金筑長官司秩正六品隸四川行省以密
定為長官世襲十四年敕勞密定曰西南諸部雖歸附
然暫入貢而已爾密定首獻馬五百匹以助征討其誠
可嘉故特遣使往諭俟班師之日重勞爾功陞金筑長

官司為安撫司仍以密定為安撫使予世襲十六年密

定遣使貢方物十八年密定遣弟寶珠來貢二十九年

以金筑安撫司隸貴州軍民指揮使司永樂初年金筑

安撫得琛來朝賜絨錦文綺洪熙宣德改元皆貢馬十

年直隸貴州布政司正統五年安撫金鏞貢馬成化弘

治隆慶時歷朝貢萬歷四十年吏部覆巡撫胡桂芳奏

金筑安撫土舍金大章乞改土為流設官建治欽定州

名鑄給印綬改州判為流官授大章土知州予四品服

色不許管事子孫承襲隸州於貴陽府遂改金筑安撫
司為廣順州

明史卷三百十六

欽定四庫全書

明史卷三百十六考證

貴陽傳領長官司十八

臣章宗瀛按地理志稱貴陽

軍民府領長官十六未載貴竹平伐二處與此互異

謹附考

貴陽傳其貴州宣慰司所領長官司九

臣章宗瀛按

地理志貴州宣慰司領長官司七未載青山劄佐二處與此互異謹附考

貴陽傳子貴榮襲

臣章宗瀛按正德中貴榮以從征

香鑪山有功加貴州布政司參政猶怏怏乃奏乞咸
龍場諸驛以償其功事下兵部時主事王守仁以言
事謫龍場驛丞貴榮敬禮之守仁貽書切責榮止其
事見王守仁文集謹附識

貴陽傳漢民張純

臣章宗瀛按張純蠻司合誌作張

純與此互異謹附考

貴陽傳應龍之祖以內難走水西

臣章宗瀛按應龍

之祖楊相寵庶子煦嫡子烈母張悍甚與烈盜兵逐相相遂走死水西見明紀事本末即下文所謂楊相喪亂者也謹附識

貴陽傳烏撒土舍謀逐安効良

臣章宗瀛按是時烏

撒土舍安効良初與堂弟安雲翔爭立廷議以嫡派立効良雲翔數為亂謀逐効良焚劫烏撒見明紀事本末謹附識

貴陽傳分兵破安順平霸霑益

臣章宗瀛按是時安

効良亦助邦彥西陷雷益而邦彥自統水西軍及羅
鬼苗仲數萬東渡陸廣直趨貴陽別遣王倫等下甕
安襲偏橋以斷援兵見明紀事本末謹附識

貴陽傳已以王三善為巡撫

臣章宗瀛按是時三善

師次平副副將徐時逢與賊戰瓮城不利叅將范仲
仁坐視遂大敗殺前鋒馬一龍等三善乃命副使何
天麟等從清水江進僉事楊世賞等從都勻進而自
將二萬人當賊鋒見明紀事本末所謂分兵三道者

指此謹附識

貴陽傳時奢崇明為蜀兵所敗計窮投水西與邦彥合

臣

章宗瀛按是時崇明求救於水西邦彥遣十六

營渡河援之川將羅乾象急破蘭州覆其巢崇明遂

走投邦彥謀分兵一犯遵義一犯永寧見蠻司合誌

謹附識

貴陽傳朱爕元為蜀督建議滇兵出霑益遏安効良應

援臣章宗瀛按六年二月邦彥謀分犯遵義而令

奢寅專犯永寧未行而寅為其下所殺無何邦彥復
寇貴州燒劫麻姑孫官堡官軍敗績巡撫王瑊遣都
司張雲鵬等敗之於趙官堡會崇明邦彥皆乞撫變
元聞於朝許之叅將楊明輝奉命往撫制書僅招撫
安位不云赦邦彥邦彥怒殺明輝撫議由此絕見明
紀事本末及蠻司合誌謹附識

思南傳元傳宣慰司

臣章宗瀛按元地理志思南在

元為思州安撫司泰定中改為宣慰司屬湖廣行省

明地理志洪武四年改屬四川六年十二月仍屬湖
廣一統志稱洪武七年析置思南宣慰司傳所載均
未詳謹附識

思南傳置思南府領長官司四

臣章宗瀛按地理志

稱思南領長官司三僅載蠻夷沿河祐溪朗溪三長
官司與此互異考明統志水德江本水特姜長官司
元屬思州洪武初改名屬思南永樂十二年屬府萬
歷三十三年改置安化縣故地理志遂失載耳謹附

考

思南傳命信國公湯和等討之

臣章宗瀛按是時和

與江夏侯周德興從楚王禎討諸蠻破上王洞殺吳面兒俘四萬餘衆且與江陰侯吳良平潭溪古州二百二十三洞籍其民一萬五千都督楊文同知韓觀勦古州洞蠻林寬俘其衆而顧成又復勦平平州六洞諸寇凡一百三十七寨見明實錄謹附識

鎮遠傳言巴也梁止諸寨為亂

臣章宗瀛按巴也梁

止蠻司合誌作巴野梁上陶効忠蠻司合誌作陶啟
忠均與此互異謹附考

黎平傳黎平元潭溪地也

臣章宗瀛按一統志稱黎

平在元時置上黎平長官司隸新添葛蠻安撫司謹

附識

黎平傳永樂十一年改置黎平新化二府

臣章宗瀛

按明實錄萬歷二十九年十一月改黎平府屬湖廣
三十一年四月還屬貴州謹附識

黎平傳覃洞上陸諸苗悉降

臣章宗瀛按覃洞上陸

方瑛傳作覃洞上隆互異謹附考

安順傳洪武初為普定府

臣章宗瀛按通志洪武十

四年仍置普定府十六年又析置安順州屬焉十八

年府廢以州為普定衛隸四川所載較此為詳謹附

識

安順傳安民自辦得赦

臣章宗瀛按是時已下安民

於獄旋釋之見明紀事本末謹附識

都雲傳元曰都雲

臣章宗瀛按元地理志置都雲軍

民府通志元時置都雲軍民府及定雲府尋合置都雲定雲安撫司隸雲南行省傳未詳謹附考

都雲傳總兵楊仁巡撫陳克宅平之

臣章宗瀛按是

時克宅調土漢官兵三萬集空下攻三月不克乃分兵歷破賊黨凱酋等空隨招降附近四十八寨苗命土官安萬銓率兵攀崖躡絕頂自山後馳下楊仁等仰面攻之遂斬阿向凱口盡平見明實錄謹附識

都雲傳都御史遣指揮郭懷恩及長官金篆往問狀

臣章宗瀛按是時都御史者為何起鳴見一統志謹附識

平越傳萬厯中始置府屬貴州 臣章宗瀛按地理志

洪武十四年置平越守禦千戶所十五年閏二月改

為平越衛十七年二月升為軍民指揮使司屬四川

尋屬貴州都司萬厯二十九年兼置軍民府於衛城

屬貴州布政司一統志所載同皆與此互異謹附考

平越傳領縣四

臣章宗瀛按地理志稱平越領縣三

曰湄潭曰甕安曰餘慶此作領縣四多一平越互異考一統志及明通志諸書平越衛置於明初萬歷二十九年兼置府治於衛城終明之世平越衛未嘗廢亦未嘗為縣至

本朝康熙十一年乃改衛為縣此所載誤又地理志及明通志稱平越領長官司二曰凱里曰楊義凱里置於嘉靖八年屬清平衛萬歷二十九年屬平越府且本

傳下文亦稱天啟四年凱里土司叛則凱里之領於
平越尤明此稱領長官司一誤且訛楊為楊謹核實
並改以歸畫一

平越傳擒阿傍餘賊猶堅守不下叅將洛忠等詭言招
撫自山後擊之殲焉遂移師龍頭黎蘭等寨悉破之

臣章宗瀛按阿傍鄒文盛傳作阿旁黎蘭等寨鄒
文盛傳作都黎都蘭互異謹附考

明史卷三百十六考證